

ASO LUA, 19 MATI 2019

Na tauaofia le Fonotaga a le Fono Aoao Faitulafono i le itula e 9:12 i le taeao e tusa ai ma Polokalame o Fonotaga a le Palemene 2019/2020.

Tatalo.

FOFOGA FETALAI: E faasilasila atu ua toe amatalia nei Galuega a le Fono Aoao Faitulafono.

Ia, avea ia lenei avanoa e faatalofa atu ai ma faapea foi ona avatu le faamalo, malo le lagimama malo le soifua manuia e tusa ai ma le tatou Galuega i lenei taeao, tatou faamoemoe ma faalagolago i le Atua e fesoasoani mai ina ia faaaaupegaina i tatou aemaise o le mamalu i le Palemia ma le Kapeneta ina ia faapena ona maua so outou finagalo tatou te faapena ona faatino ai le tatou feau ma le tatou galuega.

E faapea foi ona momoli le faafetai ma le faamalo i le mamalu o Ofisa Sili o Pulega ma Pule Sili o Matagaluega ma Faalapotopotoga a le Malo aemaise o i latou uma o lo o faapena ona manaomia le latou auunaga e ala i le Fonotaga a le Palemene.

FAAALIGA MAI LE TAITAI O LE MAOTA

E tusa ai ma le Tulafono Tumau 76 o le Palemene ua tuuina atu nei le Faaaliga i le Fono Aoao Faitulafono mo le iloiloa o Tulafono Tau Faaofi ua faaaliga iinei:

1. Tulafono Tau Faaofi o Teuteuga o le Tulafono o le Aoga Tau Faatoaga a le Iunivesite o le Pasefika i Saute 2019.
2. Tulafono Tau Faaofi o Teuteuga o le Tulafono o Taavale Feoai i Ala Tetele 2019.

TUUINA ATU i lenei aso Gafua, 18 o Mati i le tausaga 2019.

Hon TUILAEPa Dr. Sailele Malielegaoi.

TAITAI O LE MAOTA

TUUINA ATU O PEPA

Na tolaulauina e le Sui Failautusi Pepa nei ua faataatia i luga o le Laulau a Fono, e tusa ai ma T.T.49(2).

1. S.R.2019/1, Tulafono o Teuteuga o le Tulafono o le Soifua Maloloina 2019 - Faasilasilaga o le Amata Faamamaluina.
2. S.R.2019/2, Tulafono o Faiaoga 2016. Faasilasilaga o le Amata Faamamaluina.
3. P.P.2018/2019 Nu.128, Lipoti Faaletausaga a le Matagaluega o Faalapotopotoga a le Malo Iulai 2017-Iuni 2018.
4. P.P.2018/2019 Nu.129, Lipoti Faaletausaga Auaunaga o Vaa a Samoa mo Tausaga Faaletupe 2014-2015, 2015-2016 & 2016-2017.
5. P.P.2018/2019 Nu.130, Lipoti Faaletausaga a le Kamupani Vaalele Polenisia/Samoa Airways 30 Iuni 2018.
6. P.P.2018/2019 Nu.131, Lipoti Faaletausaga a le Pulega o Malae Vaalele a Samoa 2018.
7. P.P.2018/2019 Nu.132, Lipoti Faaletausaga a le Ofisa o le Loia Sili Iulai 2015-Iuni 2016.
8. P.P.2018/2019 Nu.133, Lipoti Faaletausaga a le Ofisa o le Loia Sili Iulai 2016-Iuni 2017.
9. P.P.2018/2019 Nu. 134, Lipoti Faaletausaga a le Matagaluega o le Palemia ma le Kapeneta Iulai 2017-Iuni 2018.
10. P.P.2018/2019 Nu.135, Lipoti Faaletausaga a le Faalapotopotoga o Eleele a Samoa 2017-2018.
11. P.P.2018/2019 Nu.136, Lipoti Faaletausaga a le Faalapotopotoga o Suesuega Faasaienisi a Samoa 2017-2018.
12. P.P.2018/2019 Nu.137, Lipoti Faaletausaga a le Matagaluega o Pisinisi, Alamanuia ma Leipa 30 Iuni 2018.
13. P.P.2018/2019 Nu.138, Lipoti Faaletausaga a le Matagaluega o Pisinisi, Alamanuia ma Leipa 30 Iuni 2018.
14. P.P.2018/2019 Nu.139, Lipoti Faaletausaga a le Pulega o Fale ma Malae Taalo a Samoa Iulai 2017-Iuni 2018.
15. P.P.2018/2019 Nu.140, Lipoti Faaletausaga a le Ofisa o le Komesina o Sulufaiga 2016/2017.
16. P.P.2018/2019 Nu.141, Lipoti Faaletausaga a le Pulega o Tinei Mu & Faalavelave Faafuasei a Samoa 2017/2018.
17. P.P.2018/2019 Nu.142, Lipoti Faaletausaga a le Faalapotopotoga Inisiua tau Soifua a Samoa 2018.
18. P.P.2018/2019 Nu.143, Lipoti Faaletausaga a le Faalapotopotoga o Mea tau Fale 2018.
19. P.P.2018/2019 Nu.144, Lipoti Faaletausaga a le Ofisa o le Pule Faatonu 30 Iuni 2018.
20. P.P.2018/2019 Nu.145, Lipoti Faaletausaga a le Faletupe Tutotonu o Samoa Iulai 2017-Iuni 2018.
21. P.P.2018/2019 Nu.146, Lipoti Faaletausaga a le Faletupe Tutotonu o Samoa Iulai 2017-Iuni 2018.
22. P.P.2018/2019 Nu.147, Lipoti Faaletausaga a le Pulega o Tagata Tafafao Maimoa Mai 2017-2018.
23. P.P.2018/2019 Nu.148, Lipoti Faaletausaga a le Matagaluega o Aoga, Taaloga ma Aganuu Iulai 2017-Iuni 2018.
24. P.P.2018/2019 Nu.149, Lipoti Faaletausaga a le Pulega o Fale ma Malae Taalo a Samoa Iulai 2016-Iuni 2017.
25. P.P.2018/2019 Nu.150, Lipoti Faaletausaga a le Matagaluega o le Soifua Maloloina 2017-2018.

26. P.P.2018/2019 Nu.151, Lipoti Faaletausaga a le Pulega o Faailoga ma Tusi Pasi Taualoga a Samoa Iulai 2017-Iuni 2018.
27. P.P.2018/2019 Nu.163, Lipoti Faaletausaga Iuni Lakapi a Samoa 2017.
28. P.P.2018/2019 Nu.164, Lipoti Faaletausaga a le Ofisa o le Komisi o Galuega a le Malo 2017-2018.
29. P.P.2018/2019 Nu.165, Lipoti a le Ofisa Suetusi a Samoa e Uiga i Tulaga Faaletonu 2016-2017.
30. P.P.2018/2019 Nu.166, Lipoti a le Ofisa Suetusi e Uiga i Tulaga Faaletonu 2017-2018.
31. P.P.2018/2019 Nu.167, Lipoti a le Pule ma Suetusi Sili i le Fono Aoaofaitulafono Iulai 2015-Iulai 2016.
32. P.P.2018/2019 Nu.168, Lipoti a le Pule ma Suetusi Sili i le Fono Aoaofaitulafono Iulai 2016-Iuni 2017.

TUUIINA ATU O LIPOTI A KOMITI FAA-PALEMENE

Na tolaulauina e le Sui Failautusi Lipoti a Komiti Faa-Palemene nei ua faataatia i luga o le Laulau a Fono e tusa ai ma T.T.52(5).

1. P.P.2018/2019 Nu.152, Lipoti a le Komiti o le Vaega tau le Va Fealoai i le Tulafono Tau Faaofi o Teuteuga o le Tulafono o Tau mo Faalavelave Tutupu Faafuasei 2019.
2. P.P.2018/2019 Nu.153, Lipoti a le Komiti o le Vaega tau le Va Fealoai i le Tulafono Tau Faaofi o Teuteuga o le Tulafono o le Komisi o le Gagana Samoa 2019.
3. P.P.2018/2019 Nu.154, Lipoti a le Komiti o le Vaega tau le Tamaoaiga i le Tulafono Tau Faaofi o Teuteuga o le Tulafono o le Fetufaaiga o Faamatalaga tau Lafoga 2019.
4. P.P.2018/2019 Nu.155, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga faale-Faavae i le P.P.2018/2019 Nu.109, Lipoti Faaletausaga o le Penisione a le Palemene Tausaga Faaletupe 2017/2018.
5. P.P.2018/2019 Nu.156, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga faale-Faavae i le P.P.2018/2019 Nu.93, Lipoti Faaletausaga a le Ofisa o le Komesina o Sulufaiga 2015/2016.
6. P.P.2018/2019 Nu.157, Lipoti a le Komiti o Tupe Maua ma Tupe Totogi i le P.P.2018/2019 Nu.101, Lipoti Faaletausaga a le Faalapotopotoga Faavae tau Fatuga'o a Samoa 2017/2018.
7. P.P.2018/2019 Nu.158, Lipoti a le Komiti o Tupe Maua ma Tupe Totogi i le P.P.2018/2019 Nu.102, Lipoti Faaletausaga a le Faalapotopotoga Faavae tau Fatuga'o a Samoa 2017/2018.
8. P.P.2018/2018 Nu.159, Lipoti a le Komiti o Tupe Maua ma Tupe Totogi i le P.P.2018/2019 Nu.103, Lipoti Faaletausaga a le Pulega o Tupe Faava o Malo a Samoa 2017/2018.
9. P.P.2018/2019 Nu.160, Lipoti a le Komiti o Tupe Maua ma Tupe Totogi i le P.P.2018/2019 Nu.108, Lipoti Faaletausaga a le Faaputugatupe mo le Lumanai Manuia o Tagata 2017/2018.

10. P.P.2018/2019 Nu.161, Lipoti a le Komiti o Tupe Maua ma Tupe Totogi i le P.P.2018/2019 Nu.119, Lipoti Faaletausaga a le Kamupani o Pulega o Faaputugatupe Teufaafaigaluega o Mavaega Tausi a Samoa 30 Iuni 2018.
11. P.P.2018/2019 Nu.162, Lipoti a le Komiti o Tupe Maua ma Tupe Totogi i le P.P.2018/2019 Nu.110, Lipoti Faaletausaga a le Faaputugatupe o Faamanuiaga Mo Tagatanuu Matutua o Samoa 2017/2018.
12. P.P.2018/2019 Nu.169, Lipoti a le Komiti o le Vaega tau le Va Fealoai i le S/R 2018/4 - Tulafono o Auupega Malolosi 2017 - Faasilasilaga o le Amata Faamamaluina.
13. P.P.2018/2019 Nu.170, Lipoti a le Komiti o le Vaega tau le Va Fealoai i le P.P.2018/2019 Nu.51, Lipoti Faaletausaga a le Auaunaga o Falepuipui ma le Toefuataiga 2017.
14. P.P.2018/2019 Nu.171, Lipoti a le Komiti o le Vaega tau le Va Fealoai i le P.P.2018/2019 Nu.91, Lipoti Faaletausaga a le Matagaluega o Tina ma Tamaitai, Atinae o Nuu ma Afioga ma Agafesootai 2016/2017.
15. P.P.2018/2019 Nu.172, Lipoti a le Komiti o le Vaega tau le Va Fealoai i le P.P.2018/2019 Nu.105, Lipoti Faaletausaga a le Matagaluega o le Soifua Maloloina 2016/2017.

LAFO A TAITAIFONO A KOMITI FAA-PALEMENE

FOFOGA FETALAI: Tulai mai lau Afioga i le Taitaifono o le Komiti o Tulafono Tumau, Mataupu tau Faiga Palota, Talosaga ma Tofiga faale-Faavae.

Ma lou faaaloalo ou te tapa lau Afioga i le Palemia, le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi. Lau Afioga i le Fofoga Fetalai, a o le i agai atu le tatou Fonotaga i mataupu ua taoto ma fuafua mo le aso, ou te manatu o se avanoa lelei lenei ou te tulai atu ai ma le faaaloalo e fia fai sina upu e faatatau i le faalavelave lea na tupu mai Niu Sila.

FOFOGA FETALAI: Ma lou faaaloalo ua faatuina mai e le Afioga i le Taitai o le Maota ina ia faapena ona maua le avanoa e saunoa ma malele ai e tusa ai o le faalavelave e pei ona taua.

Ma ou te tapa ma le faaaloalo lau Afioga i le Palemia e te saunoa e tusa ai o lou finagalo.

SAUNOAGA FAAMAISE A LE PALEMIA

Susuga Hon TUILAEPA AUFLUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai faapea foi le mamalu o le Maota nei, tainane foi le faafogafoga mai a le mamalu o lo tatou atunuu. Ou te taofi ua tatau ma onomea ona ou tulai atu e avea ai au ma sui e faia se faamaisega mai totonu o le Palemene lenei o Samoa. E leai nisi o toe aisili o

Taitai nei o Samoa, ma lana Fonousu e ao ai ona avea i tatou uma ma sui o Taitai o le atunuu, aua le tapuaiga a Aiga ma a latou tama, Tama foi ma Aiga tainane Tumua ma Pule, Ituau ma Alataua Aiga i le tai ma le Vaa o Fonoti. Ae a le tapuaiga ma le faanonogamanu a auauna o le Talalelei o lo o talafaaauto i le tauasuina o le ipuvai o le soifua faaleagaga o tagata o Samoa. O le paia foi faale Malo aua Le Ao Mamalu o le Malo le Sui Tofia, le Faamasino Sili ma le Faamasinoga. O paia ia o Samoa o lea ua tatau ai ona avea ai au ma sui ma tatou uma, e momoli le faamaisega i le taitai o Niu Sila, ma tagatanuu uma o Niu Sila ona o le tagatavaleina o le limasefulu o i latou na maliliu, ia faapea foi ma i latou na manunua ona o ni faufauga a i latou, moemoenoa ma le laufaleaina.

O le tagatavaleina o i latou, faapea foi i latou na manunua, o le ta lava lea ia Samoa ma atunuu uma o le Pasefika o lo o i totonu o le lio o Malo o le Pasefika (Pacific Islands Forum). O lo o tatou galulue faatasi mo le tulaga o le saogalemu o tatou tagatanuu uma aemaise o le atunuu lenei lo o tumutumu ai o tatou tagata. O se faalavelave na mamao ia i tatou uma se manatu e ono tupu i lo tatou itulagi. A o ituaiga faalavelave ia e tulai mai i le ao ma le po i Europa ma atunuu foi o Asia totonu i atunuu o Arapi. O le uiga lea o i latou o lo o faatupuina le vevesi i le lalolagi, ma o lo o latou faaaogaina ai fesoootaiga televavave, o lea foi ua maoae le tulaga ua i ai Samoa i le tulaga o atinae nei o fesoootaiga televavave. O ni faiga e faatupu ai le feinoinoai (hated), feinoinoai i le va o tagata, i le va o aiga, i le va o uso, o tuafafine ma tagata o le atunuu. O uiga ia o lea foi ua oo mai i Samoa, o lea ua faaaogaina ai le finauga mamau o le aiatatau. O le aia tatau e faaali saoloto ai o latou manatu le taupulea ma aumai ai ma ni gagana maoae. E maoae le solia ai o le vatapuia o tatou tagata, a o lo o nana mai ai i tua o le aiatatau, aia faaletatau uiga faasolitulafono, ma le uiga e talepe ai le mafana ma le maopoopoga o pulega mamalu a alii ma faipule i totonu o tatou nuu. E ao ai o tatou o taitai o le atunuu lenei, o taitai o itumalo, e ao ai ona tatou liolio i ai i uiga ia ua tulai mai, e tulai mai pea i aso uma aso uma, e o tatou lava tagata. Ua faataitai i uiga ia faatupu vevesi ia e faatupu mai fafo. O se faalavelave faatupu manatu i ai tatou o taitai o le atunuu i totonu o le Palemene lenei. O tatou o lo o malamalama lelei i feumiaiga nei, e le malamalama i ai le toatele o taitai o tatou nuu. E ao ona aua nei o tatou faatamala. A tilotilo foi i tagata nei e faatinoina uiga faapenei, e le o fealofani foi o latou aiga, o la foi e malepelepe. O uiga la ia e tatau ona liolio i ai i tatou uma, aemaise faatalanoa i o tatou itumalo, ia aua nei tupu i Samoa mea ia na tupu i Niu Sila, tupu foi i isi atunuu aemaise Amerika, o le o atu o i latou ma laau malosi ma faauma ai le ola o fanau.

O le ala lea ua ou tulai atu ai lau Afioga i le Fofoga Fetalai, faafogafoga mai foi le atunuu, ia mau pea le toovae i pulega mamalu a alii ma faipule. Ona e oo foi i pulega mamalu a alii ma faipule ua ofi atu i ai le talaiga lenei. O nai o tatou tagata e le o malamalama i uiga loloto o lo o faaaoga i ai i latou nei o tagata faatupu vevesi. Lau Afioga i le Fofoga Fetalai, o le mafuaaga lena ua ou tulai atu ai, ona o lea ua usu le Fono a Taitai o Samoa, a o lea e le i umi ona tupu mai faalavelave lenei i totonu o Aotearoa. O lo o toatele nai o tatou tagata o lo o aumau ai. O le faafetai, ona e foliga mai e oo mai i le taimi lenei, e le o maua mai se tala i se aafia o se tagata Samoa i nei uiga na tulai mai, e faavevesi ai. E le gata i Niu Sila a o le tatou itulagi a o le lalolagi atoa. O le tatalo ia fesoasoani mai le agaga o le Atua, o le Atua o lo o faavae ai le Malo lenei ina ia maua pea e lo tatou atunuu le filemu ma le saogalemu. Ia faaifo

mai lagi manu mo le tatou Fonotaga mo le aso faapea foi lo tatou atunuu o lo o tapuai mai.

Soifua ma ia manuia.

FOFOGA FETALAI: Malo faafetai. Ia, ua logo faafofoga le paia o le Palemene i le saunoaga ma le lupe faalele e pei ona malele ma saunoa i ai le Afioga i le Palemia o le Taitai o le Malo, a o se faafofoga tapuai mai a Samoa i ona tupu ma ona ee, i le paia maualuga i Tama ma Aiga, o Tama ma Aiga, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti o lo o latou po le fala ma feula le mulila i le tapuai mai i faiva o le Palemene. E faapea foi le tapuai mai i le paia i Taitai o Ekalesia e fia aemaise o feoi o le Talalelei, ua malele ma saunoa le Palemia e tuufaatasi outou finagalo ma o tatou lagona tatou te tiga faatasi ma le atunuu ma le Malo o Niu Sila e tusa ai o le faalavelave na tupu i lena vaiaso ua tuanai. Ua faapea foi ona saunoa le Palemia e molimoloo le faamaisega i finagalo ma lagona faanoanoa o i latou uma ua faapea ona aafia soifua ona o faalavelave ua tutupu ma aliali mai ia i latou o lo o faapena ona le o maua le alofa ma le agaga e le o talitonu i le Atua ma Lona finagalo.

Ia, o le tatou agaga atoa lena e pei ona saunoa ai le Afioga i le Palemia e fai ma o tatou sui e faapea foi ona tatalo ia maua pea e le gata ia Niu Sila, a o le lalolagi, e faapea foi si o tatou atunuu nei le agaga o le filemu ma le toamalie ma le puipuiga mai le Atua aua e leai se malosi, e leai lava se malosi, vagana le mana o le Atua e faapena ona tatou malolosi ai.

Ia, o faafofoga mai foi le paia o le atunuu, o fili ia o lo o tuu atu i luma o le Atua ina ia faapena ona faataumamao ma le atunuu, aua o lea ua oo i Niu Sila, e leai se mamao o Niu Sila ma Samoa, ae faalagolago i le saofaiga a le pule mamalu a alii ma faipule, ia faapena ona fesoasoani mai ma tatou galulue faatasi, ina ia tasi le fatu, tasi le loto, e faapena ona atiae ai Samoa ma taofiofi ai fili o lo o faapena ona lama mai i le soifua ma le ola.

Ia, o le matou faaopoopo lea e tusa ai ma le saunoaga a le Palemia e momoli atu le faafetai ona o le tofa ua faapena ona ae i lenei taeao.

LAFO A TAITAIFONO O KOMITI FAA-PALEMENE

FOFOGA FETALAI: Tulai mai le Taitaifono o le Komiti o Tulafono Tumau, Mataupu tau Faiga Palota, Talosaga ma Tofiga faale-Faavae.

Afioga Tafua Maluelue Tafua (Aleipata Itupa i Lalo): Lau Afioga i le Fofoga Fetalai... Malie lau Afioga i le Fofoga Fetalai e le o faalavelavea le saunoaga, ioe, ma le faaaloalo, e fia momoli atu le faamalo ma le faafetai i lau Afioga aemaise o le saunoaga mamalu a le Afioga i le Palemia. Ma e leai foi se isi o i sili o lea ua saunoa le Palemia e fai le tatou tala faamaise ia Niu Sila. Ia na o se manatu e faaopoopo i le saunoaga a le Palemia, pe a pe a fai se tatou tulai faaaloalo mo se minute e faaopoopo i le saunoaga a le Palemia e faailoa atili ai lo tatou faaaloalo e tusa ma le faalavelave na tupu.

O le agaga lea e molimoli atu ma le faaaloalo. Na o se tuualalo.

FOFOGA FETALAI: Ia, ua faatautuauega lo oulua finagalo. Ou te manatu o lea ua faapena ona molimoli le saunoaga a le Afioga i le Palemia e fai ma o tatou sui e ave le faamaisega i o tatou uso aemaise foi nai o tatou

aiga, aua a tau loa Niu Sila, ia o le aiga lea o tatou, ina ia faapena ona faamaise le agaga o le Atua i o latou finagalo faanoanoa ona o faalavelave tutupu ma aliali mai. Ia ua ou manatu ua lava lea ma totoe mo i tatou o lo o faapena ona faafofoga tapuai mai foi Samoa, ia o le latou foi lea finagalo ua fai ai le sui o le Afioga i le Palemia ma o tatou sui ma sao i lenei taeao i lo tatou lagona faanoanoa, o le faamaisega ma le tatalo foi i le Atua ia faataumamao tatou ma ia tulaga.

O le mea la lea, o le a faagasolo le tatou galuega.

FOFOGA FETALAI: Se i tulai mai le Afioga i le Sui Fofoga Fetalai.

Tofa NAFOITOA TALAIMANU KETI (Taitaifono Komiti o Tulafono Tumau, Mataupu tau Faiga Palota, Talosaga ma Tofiga faale-Faavae): Lau Afioga i le Fofoga Fetalai, e manatu o lea ua maea ona e momoli laau i Fogaa e sula ai le agalelei o le Atua e pei ona i ai le matagofie o lenei taeao. E i ai foi le talitonuga o lea ua maea ona e faatalofa ma faafeiloai i le paia mauluga o le Maota e pei ona matagofie ai lauga tuvao o lenei taeao. A o le faafeiloaiga foi aua le tapuaiga a Samoa, mai lava i mauga tetele seia paia mauga iti. Ona i ai lea o le lagona, tatou seelua i le satele, aua le galuega fai a le Nofoa e pei ona matagofie ai lafoga o lenei taeao.

Lau Afioga i le Fofoga Fetalai, ou te tulai ma le agaga faaaloalo e faatu le lafo, *Ina ia tuuina mai e le Fono Aoao se faatagaga e faaauau ai iloiloga a le Komiti o Tulafono Tumau, Mataupu tau Faiga Palota, Talosaga ma Tofiga faale-Faavae i nisi Galuega sa tuuina mai i le Komiti ona e le i maea atoatoa ana iloiloga.*

Ma le faaaloalo.

Faaluaina e le sui usufono mo Falealili Sasae, Falealili Sisifo ma le sui usufono mo Lefaga ma Faleaseela.

Na faamaonia le lafo.

FOFOGA FETALAI: Ou te tapa le Taitaifono o le Komiti o le Vaega o Atinae Eseese. Tulai mai lau Tofa i le Matua.

Afioga TAFUA MALUELUE TAFUA: Lau Afioga i le Fofoga Fetalai, ou te faatu le lafo, *Ina ia tuuina mai e le Fono Aoao se faatagaga e faaauau ai iloiloga a le Komiti o le Vaega o Atinae Eseese i Galuega sa tuuina mai i le Komiti ona e le i maea atoatoa ana iloiloga.*

Ma le faaaloalo lava.

Faaluaina e le sui usufono mo Siumu ma le sui usufono mo Falealili Sisifo.

Na faamaonia le lafo.

TULAFONO TAU FAAOFI O TEUTEUGA O LE TULAFONO O TAAVALE FEOAI I ALA TETELE 2019 – faitauga muamua

FOFOGA FETALAI: Tulai mai lau Afioga i le Minisita mo Galuega, Felauaiga ma Atinae Eseese.

Susuga Hon PAPALIITELE NIKO LEE HANG (Minisita mo Galuega, Felauaiga ma Atinae Eseeese): Lau Afioga i le Fofoga Fetalai i lou ava ma lou faaaloalo tele lava ua ou tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Taavale Feoai i Ala Tetele 2019 i lona faitauga muamua.*

Faaluaina e le Minisita o Tupe ma le Minisita mo Tupe Maua.

Na faamaonia le lafo ma faitauina le Tulafono Tau Faaofi o Taavale Feoai i Ala Tetele 2019 i lona faitauga muamua.

TULAFONO TAU FAAOFI O TEUTEUGA O LE TULAFONO O LE AOGA TAU FAATOAGA A LE IUNIVESITE O LE PASEFIKA I SAUTE 2019 – faitauga muamua

FOFOGA FETALAI: Ou te tapa le Afioga i le Minisita mo Aoga, Taaloga ma Aganuu.

Afioga Hon LOAU SOLA KENETI SIO (Minisita mo Aoga, Taaloga ma Aganuu): Malo afua ailao ua maua i lau Afioga i le Fofoga Fetalai, ua alafai mai foi i fanuga lelei le paia o le Maota nei.

A ua ou tulai ma le faaaloalo lau Afioga e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Aoga Tau Faatoaga a le Iunivesite o le Pasefika i Saute 2019 i lona faitauga muamua.*

Ma le agaga faaaloalo.

Faaluaina e le Minisita o Tupe ma le Minisita mo Faamasinoga ma Pulega tau Faamasinoga.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Aoga Tau Faatoaga a le Iunivesite o le Pasefika i Saute 2019 i lona faitauga muamua.

TULAFONO TAU FAAOFI O TEUTEUGA O LE TULAFONO O TAU MO FAALAVELAVE TUTUPU FAAFUASEI 2019 – iloiloga auilili

FOFOGA FETALAI: E tusa ai ma Tulafono Tumau e ao ona faamaonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea mo le iloiloga auilili.

Ma lou faaaloalo, ou te tapa le Taitaifono o le Komiti o le Vaega tau le Va Fealoai.

Afioga Hon GATOLOAIFAANA AMATAGA ALESANA GIDLOW (Taitaifono Komiti o le Vaega tau le Va Fealoai): Faafetai tele lau Afioga i le Fofoga Fetalai mo le avanoa. Ae ou te le i faatuina le lafo, e ao pea ona faaleo le agaga faafetai tele o le itumalo o Faasaleleaga Nu.1 i Sisifo i le avanoa ua ulufale mai ai i lenei fale matagofie, le Maota fou o le Palemene o Samoa. E avatu ai le agaga faafetai i lau Afioga i le Fofoga Fetalai aemaise o

le Palemia mo galuega lelei, mo galuega maeaea, ae tainane foi le agaga faafetai i a tatou paaga malosi le Malo o Ausetalia.

Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa le Lipoti a le Komiti o lo o fautuaina ai ina ia faagasolo le Tulafono Tau Faaofi o Teuteuga o le Tulafono o Tau mo Faalavelave Tutupu Faafuasei 2019 faatasi ma Teuteuga.*

Faaluaina e le sui usufono mo Aleipata Itupa i Lalo, sui usufono mo Safata Sasae ma le sui usufono mo Falealili Sisifo.

Na faamaonia le lafo.

FOFOGA FETALAI: Ua faamaonia nei e le Fono Aoa le Lipoti a le Komiti i le Tulafono Tau Faaofi ma o lea o le a sagai atu loa mo le iloiloga auiliili o le Tulafono.

E tusa ai ma Tulafono Tumau e amata le iloiloga auiliili i le fuaiupu 2.

FUAIUPU 2: Ua teuteuina le fuaiupu 33.

FOFOGA FETALAI: O lo o i ai le teuteuga a le Komiti i le fuaiupu 2 e pei ona faaalua i le Pepa Faaopoopo o Galuega.

Ou te tapa le Afioga i le Taitaifono o le Komiti o le Vaega tau le Va Fealoai.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai ou te faatu le Teuteuga i le fuaiupu 2 e faapea:

“TEUTEUGA:

Ia faaofi le fuaiupu 1A fou i le tuanai ai o le fuaiupu 1 e faapea:

"1A. Ua teuteuina le Fuaiupu 28: Ua teuteuina le Fuaiupu 28 e faapea:

(a) Ua faanumera le fuaiupu o i ai nei e avea ma fuaiupu (1); ma

(b) Ia aveese upu " AE VAGANA ONA E FAAPEA" o le aofaiga na totogi i lalo o lenei fuaiupu e le tatau ona sili atu i le \$150,000; ma

(c) Ia faaofi se fuaiupu (1A) fou e faapea:

"(1A) I le noatia ma le fai fuafua i le faafuaiupu (1) o le aofaiga e ao ona totogi po o le totogi faasaofaga e le Faalapotopotoga e \$150,000 po o le itiiti ifo, peitai, afai o le aofaiga o manaomia e sili atu i le \$150,000, e ao ona talosagaina le faamaoniaga a le Kapeneta".

Ma le faaaloalo lava lau Afioga i le Fofoga Fetalai.

FOFOGA FETALAI: Malo faafetai mo le teuteuga.

Faamaonia le Teuteuga.

Faamaonia le Fuaiupu 2 e pei ona Teuteuina.

FUAIUPU 1 MA LE IGOA:

FUAIUPU 1: Igoa puupuu ma le amataga

**IGOA: Teuteuga o le Tulafono o Taii mo Faalavelave Tutupu
Faafuasei 2019.**

Faamaonia.

*Na faagasolo le Tulafono Tau Faaofi o Teuteuga o le Tulafono o Taii mo
Faalavelave Tutupu Faafuasei 2019 faatasi ma le Teuteuga.*

**TULAFONO TAU FAAOFI O TEUTEUGA O LE TULAFONO O LE
KOMISI O LE GAGANA SAMOA 2019 - iloiloga auiliili.**

FOFOGA FETALAI: E tusa ai ma Tulafono Tumau e ao ona faamaonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea mo le iloiloga auiliili.

Ma lou faaaloalo ou te tapa le Taitaifono o le Komiti o le Vaega tau le Va Fealoai.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa le Lipoti a le Komiti o lo o fautuaina ai ina ia faagasolo le Tulafono Tau Faaofi o Teuteuga o le Tulafono o le Komisi o le Gagana Samoa 2019 e aunoa ma se Teuteuga.*

Faaluaina e le sui usufono mo Aleipata Itupa i Lalo, sui usufono mo Vaimauga i Sasae, sui usufono mo Safata Sasae, ma le sui usufono mo Falealili i Sisifo.

Na faamaonia le Lipoti.

FOFOGA FETALAI: Ua faamaonia nei e le Fono Aoa le Lipoti a le Komiti i le Tulafono Tau Faaofi ma o lea o le a sagai atu loa mo le iloiloga auiliili.

E tusa ai ma Tulafono Tumau e amata le iloiloga auiliili i le fuaiupu 2.

FUAIUPU 2: Ua teuteuina le fuaiupu 8.

Faamaonia.

FUAIUPU 3: Ua teuteuina le fuaiupu 10.

Faamaonia.

FUAIUPU 4: Ua teuteuina le fuaiupu 12.

Faamaonia.

FUAIUPU 1 MA LE IGOA

FUAIUPU 1: Igoa puupuu ma le amataga.

IGOA: Teuteuga o le Tulafono o le Komisi o le Gagana Samoa 2019.

Faamaonia.

Na faagasolo le Tulafono o Teuteuga o le Tulafono o le Komisi o le Gagana Samoa 2019 e aunoa ma se Teuteuga.

TULAFONO TAU FAAOFI O TEUTEUGA O LE TULAFONO O LE FETUFAAIGA O FAAMATALAGA TAU LAFOGA 2019 - iloiloga auiliili.

FOFOGA FETALAI: E tusa ai ma Tulafono Tumau e ao ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea mo le iloiloga auiliili.

Ou te tapa le Taitaifono o le Komiti o le Vaega tau le Tamaoaiga.

Tofa Hon LAUOFO FONOTOE NUAFESILI PIERRE LAUOFO: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoao le Lipoti a le Komiti o lo o fautuaina ai ina ia faagasolo le Tulafono Tau Faaofi o Teuteuga o le Tulafono o le Fetufaaiga o Faamatalaga tau Lafoga 2019 e aunoa ma se teuteuga.*

Faaluaina e le sui usufono mo Aleipata Itupa i Lalo ma le sui usufono mo Vaisigano Nu.2.

Na faamaonia le Lipoti.

FOFOGA FETALAI: Ua faamaonia nei e le Fono Aoao le Lipoti a le Komiti i le Tulafono Tau Faaofi ma o le a sagai atu loa mo le iloiloga auiliili.

E tusa ai ma Tulafono Tumau e amata le iloiloga auiliili i le fuaiupu 2.

FUAIUPU 2: Ua teuteuina le Faamatalaga 1.

Faamaonia.

FUAIUPU 3: Aiaiga faasaoina.

Faamaonia.

FUAIUPU 1 MA LE IGOA

FUAIUPU 1 Igoa puupuu ma le amataga.

IGOA: Teuteuga o le Tulafono o le Fetufaaiga o Faamatalaga tau Lafoga 2019.

Faamaonia.

Na faagasolo le Tulafono Tau Faaofi o Teuteuga o le Tulafono o le Fetufaaiga o Faamatalaga tau Lafoga 2019 e aunoa ma se Teuteuga.

FOFOGA FETALAI: Ou te tapa le lafo e faataatiaese ai le Tulafono Tumau. Tulai mai lau Afioga i le Palemia.

LAFO MO LE FAATAATIAESE O TULAFONO TUMAU 101(1)

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faataatiaese Tulafono Tumau 101(1) ina ia avanoa ai le faitauga faalua o Tulafono Tau Faaofi ia sa faitauina muamua i le taeao nei.*

Faaluaina e le Sui Palemia, Minisita mo Pisinisi, Alamanuia ma Leipa ma le Minisita mo le Soifua Maloloina.

Na faamaonia le lafo ma tulai ai Tulafono Tumau 101 (1) ua faataatiaese.

TULAFONO TAU FAAOFI O TEUTEUGA O LE TULAFONO O TAAVALE FEOAI I ALA TETELE 2019 - faitauga faalua.

Susuga Hon PAPALIITELE NIKO LEE HANG: Lau Afioga i le Fofoga Fetalai, ua ou tulai atu ma le faaaloalo, *Ina ia faitauina nei le Tulafono Tau Faaofi o Teuteuga o le Tulafono o Taavale Feoai i Ala tetele 2019 i lona faitauga faalua ma ou te fia tautala faamalamalama i ai.*

Faaluaina e le Minisita mo le Soifua Maloloina, Minisita mo Tupe Maua ma le Minisita mo Faatoaga.

FOFOGA FETALAI: Ou te tapa lau Afioga mo le saunoaga faamalamalama e tusa ai o le Tulafono ma lona Teuteuga.

Susuga Hon PAPALITTELE NIKO LEE HANG: Lau Afioga i le Fofoga Fetalai ma le paia o le Palemene. O lenei Tulafono Tau Faaofi o le Teuteuga o le Tulafono o Taavale Feoai i Ala Tetele 2019. O lenei Tulafono Tau Faaofi e teuteu ai le Tulafono o taavale feoai i alatetele 1960, Tulafono Autu. Ina ia faasaina ai ma avea ma solitulafono o gaioga i le faaaogaina o se taavale i se tuuga, se i tulou po o isi faaaliga. E le talafegai le saosaoa po o le faasaoasaoaina po o i se faiga e mafua ai, ona le mafai ona toe taofiofia le saosaoa o le taavale i luga o le aualatele.

O tuuga i magaala e le faatagaina po o tuuga taavale tutuu o lo o saoloto le saosaoa i le mamao ma le taimi faatulagaina.

Ua i ai foi le Tulafono Tau Faaofi le malosiaga o tagata ofisa faatagaina o Malu o le Malo ma alii ofisa o le LTA, e faoa faamalosi ai ma taofia faalettulafono i le lotoa se taavale sa aafia i tuuga i magaala le faatagaina po o tuuga taavale tutuu e saoloto le saosaoa i le mamao ma le taimi faatulagaina.

Lau Afioga i le Fofoga Fetalai ma le mamalu o le Palemene, o le sini autu lava o lenei teuteuga, o le Tulafono Autu e faatulafonoina ai le tapu ona toe faia ni tuuga taavale i luga o le auala, aua lava le puipua o le saogalemu o tagata femalagaai. Ae le gata i lea, ia maiio ai i totonu o nei teuteuga aiaiga o Tulafono, e vaioa ma faasalaina i latou, e faatinoina ni tuuga taavale i luga o auala.

O se faamatalaga lea ma le faaaloalo tele.

FOFOGA FETALAI: Malo faafetai, atonu ua manino. Tulai mai le sui usufono mo Aleipata Itupa i Lalo.

Afioga TAFUA MALUELUE TAFUA: Faafetai i lau Afioga mo le avanoa, faafetai foi i le Afioga i le Minisita mo le faamalalamaina o lenei tamai Tulafono Tau Faaofi. Sa ou i ai i le workshop ananafi o lena e silafia e lau Afioga. Ae ua ou toe tulai atu e faaali atu pea se manatu leaga e le i taunuu atu le Minisita i le taimi lea. Ae na o le tuualalo i lau Afioga i le Minisita, le agaga faamalo ma le faafetai. Faafetai mo le Tulafono, ae o le faaaloalo ua ou tulai atu ai, o le taua ia o lenei Tulafono ua aumai i luma o le Palemene. O se fasi vaega o le Tulafono lea, ona talu ai ua tele tagata ua maliliu i luga o aualatetele atonu o le agaga foi lea o le Tulafono. Ia faaitiitia tagata e aafia o latou soifua i le soona saosaoa o le taavale, fai tuuga taavale.

I lou talitonuga i lalo o le 38 C, e i ai nai vaega pe tasi pe lua e fia faaopoopo i ai. E le o lava le malosi o le tatou Tulafono, aisea? Aua foi ou te matamata soo lava i tuuga taavale pe a fai a tamaiti ia i le va o le sefuluono, sefulufitu tausaga e oo lava i le luasefulu tausaga. E o mai i luga o se ogaeleele ua le tau le faaaogaina i le po. O se faataitaiga o Mulinuu i tua i le mea o i ai le Palemene. Ona omai lea ua sasaa le suauu i luga o le auala, sau i le atoa le taavale oomi le taofilima ae liliu i le 360 degrees ona taamilomilo loa lea o le taavale e pei o le alu o le faalapotopototo lea e i totonu o le Maota. O le mea la e tupu, e le gata i le **ignition** o le suauu manogi la e sau ai ae le papai ia uili o le taavale i lalo. O le tasi lea vaega e taua tele, aua o lea e fai mai le Tulafono o le (38c) 1 & 2, a & b, in a manner that causes the vehicle to undergo sustained loss of traction. E ala la ona le maua le sustainable o le traction lea, e mafua mai ona ua le'i .o la e i ai le suauu i lalo o le auala ona ua sasaa i ai.

O lea la e talosaga atu ai ma le faaaloalo lava i lau Afioga, e manaia pe a tuu i ai ma se isi vaega i le (c), e faasaina ona sasaa soo se suauu po o se isi **substance** faapena i luga o le auala, e puipui ai le mea lea e ono tupu mai.

O le isi vaega lau Afioga ma le faaaloalo, o le tele o taavale ia e feoi nei, e alu alu lava e faalogo atu, aemaise lava le po ua mumu faapea lava oe o le la lea ua oso faafuasei i le iva po o le sefulu i le po. Ae le iloa o moli masalo pe faapea e fa futu le umi, e i luga o le fale po o se pikiapu po o se taavale laitiiti, e fai lava lona placing e tuu ai i luga ona faamumu lea. O le matuai malosi o lea moli ma e ese le le saogalemu, pe afai o ita lea e alu atu i le isi itu, ae lua fetau ma le taavale lea e sau. O lona uiga e tatau ona fai se fuafuaga i ai, e taofiofia ai foi ma lea vaega. E faasaina ona tuu i ai nisi vaega i totonu o le taavale e le saogalemu ai le taavale mo tagata feoi. Aua e moni lava o le saosaoa lea tatou te o ai, a o le saogalemu lea e tuliloa atu lau Afioga ma le faaaloalo.

O le isi vaega o taavale feoi, faapea au o se koneseti la e avatu e faasavali atu i luga o le aualatele. Ae le iloa o le mea la e tupu pe e te moe i le vaeluapo, pe ta le lua i le vaveao ae faateia oe i le leotele o le **public address system** la e faasau a le taavale la e alu ifo i le aualatele. E tatau foi la ona i ai se tatou Tulafono e puipuia ai le vaega lea, aua e le moe lelei le atunuu. E le saogalemu tagata, e le gata i le pao ma le pisa ae o le matua maua lava o le **diesel belt** o le mea lea e le faatagaina i lalo o le Tulafono.

O le mea mulimuli lau Afioga, o taavale ia e asu, atonu ai o i ai se Tulafono i le tatou Tulafono autu ae tatau ona faamamalu le vaega lea. Aua a silasila i ai ua tele tagata ua pule i o latou soifua, o le faiga la o le mea lea, e lagona lava le faanoanoa e tau atu, ae tatau ona tau atu pea leaga e tupu pea le mea lea, ma e le saogalemu le asu ma le kasa lea e sau i totonu o le **exhaust** o le taavale. O le uiga o lea mea, e le atoa se 15 minute e te manavaina ai le ea lea pe a leai se isi ea fou e sau ae faaletonu le soifua o le tagata. O le mea la lea e tuualalo atu ai i lau Afioga, e manaia foi pe a faaopopo i ai i le tatou Tulafono ma le vaega lea, e aofia ai ma le asu. O isi pasi, o isi taavale e pei lava o le umu le mea la e pusa i luma o ita tulou, e matua le mafai ona e iloa atu se mea i le asu o le taavale, e le saogalemu foi mo le soifua maloloina, e le saogalemu mo le tele o tagata lautele o le atunuu.

Ia e pei o nai mea ia pei ona ou tuualalo atu ai i lau Afioga, e faamalulu atu ai ia i latou sa i ai i le workshop ananafi, leaga e taunuu atu lau Afioga ua uma si au faasilasilaga i le CEO ma le Matagaluega, ae na ona tuualalo atu i lau Afioga, o lea foi e faafofoga le atunuu, aua atonu e aoga mo i latou, e le gata i le soona ki i luga o latou leitia, aua e fai sipika i totonu o taavale, o le asu o taavale, a o le soona o foi e sasaa suauu ma mea o substance faapena i luga o le auala ma maseese ai le auala ma manaia ai si a latou mea la e fai.

A o le mea mulimuli lau Afioga, o le saogalemu lava lea tatou te talanoa i ai. I lea lava vala, maimau foi pe ana.... atonu o i lea e i ai le tulafono foi lea o le depositing litre i luga o le auala pe ana faamamafa ai loa ma le vaega lea o tagata lea e tiai a latou otaota i luga o le auala. E alu alu a lea filiki atu le sikareti i fafo, e alu alu a lea ua uma ona taumafa sana taumafataga mo ipu papae foi nei plastic, o ipu na e fiu e tuu i le palapala e le liu palapala. Ia, e non disposal na ituaiga ipu plastic faapena. Ae togi lava i le auala. Ana i ai la se tulafono e faamamafa ai ma le vaega lea a o tatou i ai i le vaega lea, o le matua manaia lava ma le faaaloalo.

Ia, o se tuualalo lea lau Afioga i le Fofoga Fetalai. Faafetai lava foi mo lenei taeao, ia saga molia pea lou soifua ma lou malosi aua le faafoeina o le Fono. Faafetai foi i le Minisita e ona le Tulafono. Soifua.

FOFOGA FETALAI: Ia, se i tulai mai le sui usufono mo Salega Sasae.

Tofa OLO FITI AFOA VAAI (Salega Sasae): E faatalofa atu i lau Afioga i le Fofoga Fetalai i lenei taeao fou. E faapea foi ona faatalofa atu i le paia ma le mamalu o le tatou Palemene i le Afioga i le Palemia ma le Aiga Kapeneta faapea foi sui usufono mamalu o le tatou Palemene. E lagolagoina e lenei itumalo le Tulafono pei ona... O le taua ia i le tulaga e pei ona finagalo i ai le Afioga i le Minisita ma le Matagaluega, e pei e foliga lava i le tulaga o le saogalemu. Malo faafetai i le silasila mamao i lea vaega. Na pau lava si vaega lea tau ina faatupu manatu i lau Afioga i le Minisita, o taimi foi ia o faalavelave faafuasei lea e pei e faaogaina ai taavale a le mamalu o le atunuu, o le tau mai foi lea i le auala po o tupu ai se faalavelave ona ave lea i ai o le fesoasoani, ae ou te manatu e le o i ai se mea o faatulafonoina ai le faavavevave o taavale a le atunuu, leaga ua ou matauina, e i ai se faalavelave na aumai le taeao, ae ua fiu lava si na taavale e faaee mai latou pu o la e i ai le faalavelave e fia tuli le falemai, ia ae leai lava ma se isi o ano i ai. O le tulaga lena na ona faatupu manatu atu i lau Afioga, pe le i ai se vaega o le Tulafono e faatulafonoina ai se tulaga faapena ma i ai ni fesoootaiga foi a le o le a faaoga sana taavale e fesoasoani i le ua mafatia, i le tatou Matagaluega po o le taavale po o scooters foi nei a le LTA e escort ina ni taavale faapea ina ia sao le soifua o se ua fia maua se fesoasoani.

Na o se manatu faatupu manatu i lau Afioga, ae faafetai mo le avanoa.

FOFOGA FETALAI: Malie le sui usufono se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o le Tulafono Tau Faaofi lenei e agai atu i o i le Komiti latou te vailiiliina ona toe foi mai ai lea i le tatou Fonotaga. Ma ou te manatu o finagalo faaalua ia o le a aoga tele mo le soalaupuleina o nisi foi teuteuga o le tatou Tulafono. Ae taua tele le faatupu manatu a le Minisita e ana le Tulafono le Afioga ia Papaliitele. E le i leva atu ona fai le iuga a le faamasinoga, ma e i ai la sina fuaitau sa ou matauina, e pei e faataua tele e le Faamasinoga le tulaga lea o le saogalemu, ae aoga foi mea tutupu ua tupu ae ai se manatu i le Afioga i le Minisita ma aumai i totonu o le Kapeneta le mataupu lenei ma pasia ai. O mea nei o taavale tutuu ia, e le natia, ua alu i luga le tamaoaiga o Samoa, ua i ai aiga ua tele le tupe, ona nonofo loa lea ma faatau a latou taavale, ua tofu tamaiti ma le taavale, o le 15, 13, 12. O tamaiti nei o lea e i ai le agaga foi lea o le mitavale, ae i ai foi la ma isi aualii ia e i ai i totonu i i ua oo i le tai 40 tausaga ae tele le tupe, 40 tausaga le matutua, tele le tupe ma ua mafai ai ona o fai le latou faalapotopotoga lea o tuuga taavale. E muliai nei ona maliu le isi tamaitiiti lea i lana ia lava taavale, i le faiga lea sa saunoa i ai le sui usufono mo Aleiptaa Itupa i Lalo, le mea lea o le mitavale ma taumafai e faataitai le matua alu i le atoa o le taavale taofi tutu loa le taofi ona tupu ai loa lea o le mea lena e tai pei e taavili foi lea le taavale, ae pei la e fiafia latou e fai le mea lena. Ia o le taaviliga la lena lea na crash ai loa le taavale lea ma oti ai loa le tama lea.

Ia o le tulaga la o lea e taumafai i ai le Matagaluega, ua lagolagoina tele foi e le Kapeneta le fai loa o le Tulafono, mea ia e mataitu e Minisita. E silafia loa le mea e faaletonu, tope loa ma le Tulafono ia aua ne i tulai mai ni faafitauli ona o le le mataala o le Minisita. O le mea lea e faafetai ai. E i ai lava la nisi o teuteuga ia ua aumai, atonu o le avanoa lea e agai atu ai teuteuga e pei ona aumai e le Afioga i le sui usufono mamalu mo Aleipata Itupa i Lalo.

O le tulaga foi i le mea leni o le tutupu o faalavelave ae e alu ave se tagata i le falemai, ua faalua ona ou faia le mea lena o le lavea o le tagata ae fetautonu ma le oo atu i ai o lau taavale ona ou tu lea, a ua sola le tagata lea na tupu ai le faalavelave ona ou ave lea i le falemai. E leai lava se mea e soona tatope ai fua i le falemai. O lau fautuaga tele lena i le vaega lea e latou te vaaia mea ia o taavale ia e lavea faafuasei ona alu lea soona saosasoa. E matua moomia le alu lemu o le taavale ne i afaina tele ai le tagata ua mai, a o le mea taua ia vave ona oo i le falemai. O le vaiga lea ou te vaai nei i ai i isi taavale ia e soona alu le mafaufau, ma o le soona alu foi e ono atili saluelue ma ono atili lavea ai le mai o lo o tau avatu e faaola. O le tulaga lena o lea foi e faafeagai lelei ma faatonuga a le vaega lea e nafa ma taavale nei, aua le soona saosasoa vale le taavale, i alu atu foi lavea mai ai ma nisi tagata i le soona saosasoa. Ma o le tulaga lena i le mea o le care, o le ave faaeteete o taavale afi, o le mea lava lea e taua mo i tatou uma, aemaise lava i latou e taunuu atu i se faalavelave ua tupu, a ua sola le tagata na tu ai, ona o le uiga lava lea o tatou, a vaaia loa se faalavelave ua tupu ona omai loa lea ua faaoo le... ua oti ai tagata i mea faapea. O le mea o le osovale, a o lea e tu atu le tagata e fia ave le tagata i le gasegase, ua toatele tatou tagata ua oti ai i le mea lea. E i ai foi le taavale na ou sau ai na muamua atu i luma na sau ai le Palemia, ae tamoe mai le teineitiiti faalava mai e le lelei le mafaufau, ona lavea ai lea. Na ona laga mai lava o tagata, alu ma ala i le Palemia, sa ou mulimuli mai ai i tua. O le uiga lava lea e aoga foi le lagalaga o mea faapenei i totonu o le Maota, a o faafogafoga mai tagata, aua o le tele o latou ia e lavevea, e mafua ona lavevea, e le o le avetaavale, a o mea nei o fanau o le tuli foi lea e taaalo te i lava ua faalava ane i luga o le aualatele. Ia o le a la le mea o le a fai? O lea la o le a tu atu le avetaavale e fesoasoani ae laga ifo tagata e le o mafaufau i le taua o le mea lea ua tupu. E le o le avetaavale e mafua ai, a o le tu e fia fesoasoani, ae o ane e sa tutu ai i ina faaoo le oti. Ua i ai o tatou tagata ua feoti ona o le tulaga lena. O le mea la lena o lea e sola ese mai ai, a o le a e tau mai ai ona latou aumaia lea o le gasegase e ave i le falemai. E i ai le tagata faapena na tupu foi le faalavelave ou alu ave i le falemai, ae ou sau i le Ofisa o Leoleo, o lea e nofo atu ai e fai lana lipoti.

O tulaga la faapea lau Afioga i le Fofoga Fetalai e taua tele ai le Tulafono Tau Faaofi lea ua aumai, a o fautuaga ia ua aumai, e taua tele mo nisi mea faaopoopo ina ia atili ai ona lautele le aoga o le Tulafono.

FOFOGA FETALAI: Malo. Ia se i tulai mai le sui usufono mo Anoamaa Sisifo.

Tofa Hon LAUOFO FONOTOE NUA FESILI PIERRE LAUOFO (Anoamaa Sisifo): Lau Afioga i le Fofoga Fetalai, faafetai mo le avanoa. O le a ou le toe oo foi i nisi vaega, o lea ua manino ma malamalama foi i saunoaga a sui usufono ua maea. O lea foi ua saunoa malamalama le Afioga i le Palemia, ae na pau lava nai manatu e faaopoopo atu i le Komiti, aua o lea e maea ona faasee lea i le Komiti le Tulafono. O lea ua saunoa le Afioga i le

Minisita i le anoniu o lenei Tulafono Tau Faaofi, ma o lea ua malamalama o le anoniu tonu lava lea faasolitulafono tuuga taavale ina ia foia ai faalavelave o lo o tulai mai, aemaise lava i taimi e faatinoina ai tuuga taavale, e maua i lipoti, o le taimi foi lea o vaveao o lo o saoloto ai latou o lo o faia lenei faiga i luga o aualatetele a le Malo, e faapena ona faalavelave ai i le mamalu o le atunuu o lo o faaaogaina auala.

Na pau lava nai fautuaga e fia tuuina atu i le Komiti, ia silasila i le faasalaga, ma faasalaga ia e pei ona maua atu i le Tulafono Tau Faaofi, e tutusa lelei lava faasalaga o tuuga taavale ua oo ai i se tagata le maliu, ma le faasalaga e oo ai i se tagata le manua. O faasalaga lea e aumai e tutusa lelei lava, e le sili atu i le 5 tausaga i le falepuipui, 20 iunite tau faasalaga, ma le seia o le laisene i le tausaga po o le sili atu. O lou la taofi, e tatau ona atagia i le faasalaga le eseese o mea ia, e ese le maliu ese le manua. O le maliu la i lau fautuaga, tuu i luga i le 7 tausaga, ae taatia pea le 5 tausaga mo e ua manunua ona o faalavelave nei ua tulai mai i tuuga taavale.

O le isi vaega lea pei ona aumai, e i ai le malosiaga ia i latou e i ai le malosiaga, o leoleo po o le LTA pe a, e ave faamalosi ai le taavale, e aveese le taavale ona ave lea in bound, o lea e aumai i le Tulafono e ave taofia i le Ofisa o Leoleo. Ae manatua foi, o le tele o taavale nei, aemaise lava tupulaga pei ona saunua le Afioga i le Palemia, ua fetagofi toe faaopoopo ai isi vaega i totonu o afi o taavale ina ia faasaoasaoa tele ai pe faasaoasaoa atili atu le taavale nai lo le saosaoa tapulaa na gaosi ai ma fausiaina ai le taavale ina ia matua saosaoa tele atu le taavale nai lo le tulaga o le saosaoa masani pei ona i ai ma le usitaia ai tatou mea o speed limit po o laupapa o lo o faapena ona taua mai ai vaega tapulaa i lea vaega auala ma lea vaega auala.

O lau la fautuaga faaopoopo i le Komiti, silasila i le tulaga lea, e le gata o le ave faamalosi o le taavale, ae faaleaga ma le taavale, dismantle. Ona o taavale nei e le tatau ona feoi i luga o aualatetele a le Malo aua o lea ua fai faaopoopo i afi, o lona uiga e illegal. O le fautuaga foi la i le tatou LTA, aua e leai se taavale e mafai ona fealuai i luga o le auala ae le i pasiaina e le LTA. Se i mataitu ma silasila lelei la i taavale nei, a avatu i le taimi lea e avatu e pasia ai, e tatau ona taofia e le tatau ona pasia e fealuai i luga o le aualatele, ona o lea ua i ai ia vaega faaopoopo i afi, ua atili saosaoa ai taavale. O le mafuaaga foi lea e tutupu ai faalavelave o le soona i le atoa ma saosaoa lemafaufau i luga o aualatetele a le Malo.

O lau la lea fautuaga, aua o le mea lea ou te fautua atu ai i taavale ia e faaleaga taavale, o mea foi o la e fai i isi atunuu. E le o se mea fou le mea lea ou te talanoa atu ai, o la e fai foi i isi atunuu le faiga lea, ina ia taofia ai taavale ia illegal e le tatau ona feoi i luga o le aualatele.

Ia o nai manatu ia lau Afioga i le Fofoga Fetalai ae le i faaiuina atu ia se tala a lenei usugafono, e momoli atu le faamalo ma le faafetai, lau Afioga i le Fofoga Fetalai, Taitai o le Malo ia faapea uma latou sa faapena ona tuufaatasia ma fuafuaina, gapatia ma galulue i le fausiaina o lenei Maota Fono fou ua tatou i ai nei i lenei taeao. E momoli atu ai le faamalo ma le faafetai, i tulaga matagofie e pei ona molimauina, ia aua o le tatou Fonousu muamua lenei i le tatou Maota Fono lenei, i lenei taeao fou. Agalelei le Atua i ai latou ua faaaogaina lenei Maota, ia faapena foi ona saunia lelei e le Atua, ia latou o le a autovaa mai i totonu o lenei Maota i aso o lumanai.

Ia o le matou tala lea, ia faapena ona lagimatafi lau Afioga, aua ne i.... lagimatafi lau Afioga, agalelei le Atua i sui usufono mamalu o le Maota, ia folau i lagima le tapuaiga a Samoa, manuia.

FOFOGA FETALAI: Ia se i tulai mai le Afioga i le Palemia.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai e i ai lava si vaega lea ua taua e le sui usufono e tatau ona malamalama i ai le Maota lenei.

O tatou Tulafono, e sao lelei le mataupu lea e laga e le sui usufono. O mea nei o sala, o tatou sala lea e i ai nei, o le faaupuga masani, ia le i luga atu o le 5 tausaga e falepuipui ai. Ma ia le i luga atu o le \$100,000 le sala. O lona uiga la, e mafai lava na o le 1 le aso e falepuipui ai. O lona uiga o so o se mea e alu atu i le 1 e oo i le le i luga atu. E faapena foi la i le sala tupe, ia le i luga atu po o le \$100,000 po o le \$200,000, ae ia le i luga atu o le \$100,000, e amata atu lava i le 1. A sau lava le iuga e na o le \$5.00 e na o le \$5.00 lava.

O le ala lena la ua tumutumu ai le tatou falepuipui, e pei e fiafia tagata e soli pea Tulafono, i le iloa e alu atu foi le faasalaga e na o le \$1.00 pe na o le \$10.00 pe na o le 1 le aso, ia ma fiafia ai lava lea o le tagata solitulafono e soli pea ona o faaupuga ia. Ia o le mea sili lea e faalogologo mai ia le autusi Tulafono. Se i tilotilo ifo i ituaiga sala ia e fai nei, e matua le taitai ona talafeagai.

O le tulaga la lena i a tatou faasalaga, ia ae taua tele ia le vaega lea sa laga e le sui usufono. E oo foi la i le tulaga i vaega ia e i ai foi ma mea ia o latou ia sa taua muamua foi, e feoai ma moli foi ia e faaemoemo. E na o leoleo lava e feoai ma moli emoemo. Ae ua fai foi moli emoemo a i latou nei, ma mea o moli foi ia e faasesega mata. O mea uma ia ou te lagona e tatau ona tuu i totonu o le Tulafono lenei, ina ia taofia ai... o le mea la lea a tau alu atu ai leoleo e tau faaemoemo atu moli, ua tau le amanaia e tagata, mo le emoemo atu o moli o le taavale e tatau ona ave le mai i le Falemai, ua tau le amanaia e tagata ona o le tele o taavale ia e feoai solo, ma latou moli emoemo a le vaega lenei.

A o latou foi i fafo atu, aua e fai ma faatusa pea tatou i fafo, o fafo, e o lava latou nei e maua mea, e faatau ni fanua e fai ai ia latou tuuga. Ae aua le faia fua i luga o auala a le Malo ma le tutupu ai o faalavelave.

Lau Afioga e na o sina toe faataua o finagalo ia na faaalia e le sui usufono mo Anoamaa i Sisifo ona e taua tele le tulaga lea, e tatau ona matua tilotilo i ai le Malo, i le tulaga o faasalaga ia e fai nei. Ua pei o ni mea ula foi ia i tagata e pei e foliga mai o ni sala tele. E te oo i le 7 tausaga o e falepuipui e oo lau sala i le \$50,000. Ia ae o le faalavelave lena a sau lava le iuga o le Faamasinoga e na o le 2 aso e falepuipui ai e na o le 2 lava aso e te falepuipui ai ona o le tulaga lena ona o lea e faaoga le mea lea, ia le i luga atu. Masalo e lelei pe a faapea, ia le i lalo ifo, ia ona e iloa ai lea, o le mea lena e oo ia oe, ia le i lalo ifo o le 5 tausaga, ia ona iloa lelei lava lea e le tagata o le mea lea, ia le i lalo ifo. O lona uiga e 5, 6, 7, 8 tausaga.

Lau Afioga i le Fofoga Fetalai, o le taua lena o mataupu ia ua laga e Taitai o le atunuu i le taeao lenei.

FOFOGA FETALAI: Ia malo, ma e...

Susuga Hon PAPALIITELE NIKO LEE HANG: Lau Afioga i le Fofoga Fetalai, manu e le i tuuina atu le avanoa i nisi...

FOFOGA FETALAI: Ia se i tulai mai le Minisita e ana le Tulafono lenei...

Susuga Hon PAPALIITELE NIKO LEE HANG: Ua ou manatu ua tatau ona ou tulai i le taimi lenei e tau faamalamalama nisi mataupu ua lagalaga ai finagalo o sui usufono mamalu. O isi fesili ia sa talanoaina ananafi lau Afioga ma ou te manatu e i ai nisi sui usufono e le i auai, e pei la o le a toe foi ai i tua le galuega... manaia lava le tapenaga ananafi i le faamalamalamaga o le Tulafono.

Ae i ai lava nai issues ia ua toe laga ai i lenei taeao ou te fia talanoa pea i ai,

Susuga Hon Laauli Polataivao Leuatea (Gagaifomauga Nu.3): Lau Afioga i le Fofoga Fetalai, ma le agaga faaaloalo....

FOFOGA FETALAI: Ia se i faamaea mai pea le saunoaga a le Minisita, e i ai se mea le sui usufono mamalu o lea...

Susuga Hon Laauli Polataivao Leuatea: Ia matau ma le agaga faaaloalo leaga o lea o le a tali le Minisita ia ae lea e le i uma atu nai motugaafa...

Susuga Hon PAPALIITELE NIKO LEE HANG: Lau Afioga ou te le o tali na ona faamalamalama se i tali nai mea ia semeamanu e le i toe laga mai e nisi sui usufono mamalu, aua o mea ia e lelei ona malamalama, ia aua lea ne i toe laga mai ma lou ava lava.

FOFOGA FETALAI: Ia o le fesoasoani a le Minisita, o le fesoasoani i le Palemene ae o la e tau faamalamalama nisi o tali. Ia e fesoasoani mai i le tatou semina ananafi sa tuu lava i o outou finagalo ia aepeitai o lea e... Afai o finagalo ia o sui usufono e le i auai i le tatou semina o le a toe toso la i tua, e le faapena le faiga o le tatou galuega. E le avea lou le auai i le tatou semina ma mea o le a toe toso ai i tua le tatou galuega a le Palemene. Na ala foi ona fai faiga ia i le tulaga lea ua avea ma faiga masani faaPalemene e muamua ona fai le latou semina e faapupula ma faamalamalama ai ia tatou Tulafono e Faauluuluga o Matagaluega, ina ia tuuaititia ai taimi o le tatou Palemene e alu i felafolafoaiga. E ui i lea, ia saunoa faamaea mai pea ia le Minisita, ia ona alolofa lea e faapuupuu mai ia saunoaga.

Susuga Hon Laauli Polataivao Leuatea: Faafetai.

Susuga Hon PAPALIITELE NIKO LEE HANG: Ia faafetai i lau Afioga i le Fofoga Fetalai. E pei o le manatu lena lau Afioga ona e manatu ua toe fesiligia foi e nisi fesili ia mataupu sa lagalaga i finagalo ananafi.

E muamua momoli le faafetai i le Afioga i le Taitai o le Malo, mo le lagolagoina foi o lenei Tulafono puupuu, ia aemaise foi ia aemaise foi ia afioga i sui usufono mamalu ua uma ona sausaunoa i le Tulafono.

O le saunoaga i le Tofa i le matua ia Tafua, o moli, o le mea foi lea e faaleotele ai se speaker i totonu o pasi ma tulaga faapena, o le mea lea o le alu o le taavale ua pa le mafa ma sau ai le kasa uliuli foi lea o le gas emission e faaletonu ai foi le siosiomaga, vagana la o mea uma la ua i totonu o le Tulafono, o Regulations a le LTA.

Vagana la le mea fou lea na faapea mai o le sasaa o le suauu i le aualatele, ia e le o manino la i ai ia le... aemaise foi lou nei tagata i le tulaga lea o lo o faaaogaina e tamaiti ia e faaaoga e tamaiti ia e fai tuuga taavale e sasaa le suauu lenei ina ia taavilivili le taavale. Masalo o le Afioga lava ia Tafua lea sa

molimauina maumau pe ana pue se ata foi lenei e... ia ma le lapisi lava. E talitonu o le isi tulaga lea e tatau ona tuu i totonu o le Tulafono, i mea ia o pasi ma taavale e o ma tauai lapisi i fafo ae o la e femalagaai ia latou taavale. Faamauina ia teuteuga ia aua le tuuina atu i le Komiti mo se latou iloiloga.

Lau Afioga Levaopolo ua uma ona tali le Afioga i le Palemia i le tulaga lea o le faaaogaina o private vehicles ma na ua faamanino e le Afioga i le Palemia ae tuu mai pea se i tuu i totonu o tatou Regulations i le faaaogaina o taavale, e tatau pea ona valaau le ambulance ia po o le taavale fuimu, i tulaga faapea. Ia o le taimi lava o le emergency, o le a lava le tulaga, e tatau foi ona faaeteete ia taavale lea private vehicle mo le puipuiga o le saogalemu o le mamalu o le atunuu o lo o feoai i luga o le aualatele.

Lau Afioga ia Fonotoe, ia e sao, sa laga foi le mataupu lea ananafi i faasalaga ma o lea sa faamauina, e ese le faasalaga o le tagata ua maliu i se faalavelave i le na aafia ai le tagata lea ua afaina, ese foi le faasalaga mo le ua manua, na o se manua ae le o maliu. O lea la ua toe taatia mai, e sao le saunoaga a le afioga i le sui usufono mamalu, e le tatau ona tutusa ia faasalaga ia, ma o lea la ua taatia mai se i toe teuteu. Ia o nai mea ia e toe faamatala atu ina ne i toe fesiligia ia le tulaga ia, ia ae e pei o le tulaga lena i le faaaogaina o le avanoa lea ua ou tulai atu ai e tau faapupula nai mea laiti ia ma lou faaaloalo lava.

FOFOGA FETALAI: Ia se i tulai mai lava le sui usufono mo Anoamaa i Sasae. Toe o le toatolu lea, se i faapuupuu mai sui usufono mamalu e faamolemole.

Afioga ALAIASA MUAGUTUTI'A MOEFAAUOUO SEPULONA MOANANU (Anoamaa Sasae): Ia le malutaee o le aofia ma le Fonousu a Samoa i lenei taeao, viia le alofa o le Atua i lana pule faasoifua. Leai o tatou mea ia i lou talitonuga lea e fai i tua, ia o tatou mea lava na, ae o i e sasaa ai le fafao aua ia finagalo o le Palemene aua lenei mataupu.

E lagolagoina e le sui usufono mo Anoamaa Sasae, le Tulafono lenei. E ui lava e na o le tamai pasene lava o le atunuu lea e aofia i le mea lea. Ae o lea o le a gasea le tofa a le Fonousu, i le tatou talanoaina o le mea lenei. Afai o le faalavelave lea na tupu, lea na feoti ai lava latou, ae faafetai i le Atua ua malutia le soifua o le paia o le atunuu ona o nei ituaiga uiga faapenei. Ma ou te talitonu ai lava au ia, ua tatau ona faafofoga mai i latou ma taofi loa nei mea. Aua ne i toe tupu mai ni mea faapea, ia e aafia ai lo tatou atunuu. Ia o lea ua manaia, o lea ua i ai aiaiga ma faasalaga.

Ae na o sina ou manatu foi lea leaga o lea ua tatou tagofia le taavale saosaoa, ae ese le faalavelave o le taavale e alu lemu i le auala i le taimi lenei. Toetoe lava a le alu ae o la e talanoa i le telefoni ae o le que a taavale ua atoa le 40 taavale la e mulimuli atu ai. O le mea foi la lea, e tatau ona tuu atu i talane o le Minisita, lau Afioga i le Minisita, aumai se fuafuaga o lenei ituaiga tagata. Ioe, o le taimi lava e te faatafa ai o le a e alu atu i luma, ona e vaai atu lea ua te i lava ua tuli mai oe. Te i lava ua tuli mai oe e pei ua ita. O uiga fiatagata o tatou tagata, e faapena, ae tatau foi ona aiaia, leaga e faalavelave i luga o le aualatele a le Malo o lo o feoai ai ia le paia o le atunuu. Ia ma le agaga faaaloalo, ia manuia lau Afioga i le Taitaifono, le Fofoga Fetalai, ia manuia le taeao.

FOFOGA FETALAI: Faafetai, toeitiiti lava a misi i le tatou Fono le manatu lelei lea o Anoamaa i Sasae. Malo faafetai.

Susuga Hon Laauli Polataivao Leuatea: Lau Afioga i le Fofoga Fetalai...

FOFOGA FETALAI: Ia se i tulai mai le sui usufono mo Gagaifomauga Nu.3.

Susuga Hon LAAULI POLATAIVAO LEUATEA: Faafetai i lau Afioga i le Fofoga Fetalai mo le avanoa. E fia faaleoina foi le agaga faafetai i lenei taeao, i le alofa ma le agalelei o le Atua, o lea ua tatou toe sui ula i le malae i Tiafau. A tomanatu ua 5 tausaga o le tatou folauga, sa tatou agai ai tatou te Maota tauave i nisi o Maota o le atunuu. Faafetai i le Atua ua tatou toe aofaga potopoto i le malae tofia o Samoa. E momoli atu ai le faafetai tele i lau Afioga.

E tulai lenei itumalo e faaleo so matou lagona e ala i le Tulafono. Lau Afioga i le Minisita matou te lagolago, i le tulaga ona o le tulai mai o faalavelave ma le solia o Tulafono o aualatetele ona o le faaaogaina e nisi o taavale. Peitai, o se matou tuualalo lau Afioga i le Fofoga Fetalai, ina ne i avea lo tatou manatu i nisi o itu, ae galo ai le isi itu. E tautala ma le faaaloalo, o le mea lenei o le car racing o le sport i le lalolagi atoa. E le faapea ua toe na ma se laina i le atunuu i le taimi lenei, o lea ua tatou vaavaai i le tulaga o lea ua agai mai ai foi. E pei ona saunoa le Afioga i le Palemia, its an event, e tupu ai nisi foi o mea lelei. Neā teā ua o tatou manatu i le taofiofia lea, o lea ua oo le saunoaga a sui usufono i le talepe o taavale. O lea foi ua oo le saunoaga a sui usufono i le demolish o taavale. Ae eseese foi o tatou manatu ma manatu o i latou o lo afua ai mea nei.

O le tuualalo lau Afioga i le Fofoga Fetalai, faamata e le o le taimi lenei e silasila ai ma faaetulafono se tulaga i le agai mai foi o lenei taaloga fou i lo tatou atunuu, ae faatulafono lelei ona fai. Faatulafono lelei aiaiga ma Tulafono o mea nei e tau o car racing o bike racing, o car shows. O lea ua tatou vaavaai nei i mea sa faatino e le asosi lea na ou matamata i ai, e ese foi le tumutumumu i ai o le atunuu ma lo latou foi interest, e latou te naunau e o e lagolago mea ia.

I le tulaga lava faataaloga, o lau lea tuualalo, toe silasila ifo lava le Palemia ma le Kapeneta pe faamata e le o le taimi lenei ua tataua loa ona faatulaga lenei foi mea ua agai mai. Aua e le o se mea na o tatou, its globally e tutusa lelei lava ma le fishing game lea e international fishing game, e tutusa foi ma le tuuga solofanua lea e sau nei. There will be a time e mafai ai ona ulufale mai foi nisi o atunuu mai fafo, e omai foi e agai mai e fia taaalo i le taaloga lenei. A ia tataua la i lau Afioga i le Fofoga Fetalai ona faatulaga se aiaiga talafeagai e aloaia ai le taaloga lenei e tau, o le tuuga taavale i Samoa. Na tatou vaai uma lava o Shoemaker o ai uma taaloga taualoa i le lalolagi atoa. This is their sport, ae ona o le mea ua tupu mai ua feoti ai ua faaoga sese luga o le aualatele, ou te lagolagoina ai lau Afioga i le Minisita ma lau Tulafono. Ia faasa i luga o aualatetele, ae ave le avanoa ia i latou ma lo latou foi agai mai, e faatulaga ai se category e faaoga e agai i ai latou ina ia faatupu leí .its such an event, e taua tele foi mo lo tatou tamaoiga ma le faatupu aloaia o nisi o tamaoiga e agai mai.

A o le agaga lena e tatala foi le avanoa mo le aia tataua a nai nisi o i latou o lo o ua agai foi lo latou mafaufau e adopt le mea lenei e tau o tuuga taavale i totonu o le atunuu a ia malu puipuia.

O le tuualalo lena a lenei Itumalo ma lou agaga faaaloalo.

FOFOGA FETALAI: Se i tulai mai le sui usufono mo Faleata i Sisifo. Faapuupuu mai lou finagalo.

Tofa LEALAIPEPULE RIMONI AIAFI (Faleata Sisifo): E momoli atu le faafetai tele i lau Afioga i le Fofoga Fetalai. O ai a fia lauga puupuu i lenei fale fou ua tatou fono ai. Ou te tulai ma lou agaga faagaetia, le agaga mitamita i lenei galuega. O ai na iluilu tatou te toe fono mai iinei i Tiafau i le malae o le Faautugatagi. O le ala lea o lou tulai lau Afioga, ae o le a faaumi laititi lava lau tala i le Tulafono.

Faafetai i lau Afioga i le Minisita mo le Tulafono. Muamua, o le vaega lea e 1.2, i le malosiaga lea ua ave i alii malu o le Malo. O le mea lea e fia malamalama lau Afioga, ona o lea e pei e i ai lava le feteenaiga lea i le va o le LTA ma le Traffic a leoleo. O lona uiga o lo o i ai uma le malosiaga i le LTA ma leoleo e faatino e i latou le vaega lea o le Tulafono. A tulai mai la, o ai tonu la e alu i ai le tagata? Afai e impound e le LTA e te agai la i le LTA, afai o leoleo o lona uiga e faapena foi. E mafai ona faamanino mai le vaega lea o le Tulafono?

O le isi vaega, o lena e silafia lelei e le LTA ma le Matagaluega a leoleo magaala o lea e fai ai mea nei. O lena e mautinoa le tele o magaala lea e faaoga, e tele ina faaoga magaala ia a le o lalo o le uati. Aua o aso ia sa faaoga ia Mulinuu, ia magaala ia e double lane. Pe le i finagalo lau Afioga ma le Matagaluega, ua tataua ona fai ni cameras CCTV, e tele magaala nei. Aua e le mafai pea ona tatou taofiofia mea nei, aua e fai ma tulai ma tupu mai pea. E aoga tele mea ia e taofiofi ai mea na mai le toe tulai mai.

I le agai i le lumanai e fautuaina lau Afioga e tataua ona tagai i ai i le vaega lea ina ia fai ni speed cameras i vaega tonu ia e masani ona faaoga e tagata nei, e fai ai a latou tuuga taavale. Ma le faaaloalo faafetai lava i lau Afioga i le Fofoga Fetalai.

FOFOGA FETALAI: Ua ou manatu o lea ua see le vaa o le Fofoga Fetalai. Se i tuu atu le avanoa i le Minisita. E i ai sou finagalo i manatu iaí .

Susuga Hon Papaliitele Niko Lee Hang: Lau Afioga i le Fofoga Fetalai, o lea e tau vaavaai atu, o sui usufono ia na auai ananafi, ao lea foi ua toe tutulai mai. Na fai lava lau faamatalaga, o i tatou uma lea ua auai i le Fonotaga lenei e le tataua ona toe fesiligia le Palemene taeao. Ae tuu pea la le avanoa po o ni fesili fou po o le a le tulaga lea.

Afioga Fuimaono Teo Samuelu Teo: Lau Afioga i le Fofoga Fetalai,

FOFOGA FETALAI: Sa o tatou faatasi ananafi, ae ui i lea o lea ua finagalo leí í ae faapuupuu mai.

Afioga FUIMAONO TEO SAMUELU TEO: O le ala o le tulai, leaga o lea ua uma ona laulau mai e le afioga i le Minisita vaega sa talanoaina ananafi. E leai foi la se isi e toe faatautee i ai. E pau lava le lagona ona e i ai vaega ia e misi mai i lau lisi, ne i te i ua pau ia te oe. O lea ua e faalaulau maia ia laauí

FOFOGA FETALAI: E na ona ou faamanatu atu o le Tulafono e alu i le Komiti, e tele lava le avanoa mo sui usufono. Ae saunoa mai.

Afioga FUIMAONO TEO SAMUELU TEO: O le taua ia foi ona o lea e faafogafoga mai i latou o lo o aafia. E pei o le vaega lea aua o lea ua saunoa mai le Afioga i le Minisita i moli faasesega mata ma moli emoemo aemaise o faasalaga ua uma ona talanoaina, o laau foi ia faaleoleoa. Sa talanoaina foi taavale alu alu lemu, masalo ana afio atu foi le Afioga i le sui usufono e malamalama ai foi, sa talanoaina.

Ae o le vaega lea ua laga ai se leo, ina ia toe faamanatu e le Afioga o le makaina o le tatou auala lea e i le taulaga, aua e oo mai i le taimi lenei. O la lava e i ai au faau sese. O la e o mai taavale agai i o, ae o la e o atu ulu o au agai i le mea e sau ai le taavale. Ina ia mafai ona tape, ua leva ona sui le itu auala, ao la lava e olaola au na. E tele ina sese ai avetaavale o mai mai fafo. O le isi vaega e le o aafia mai i lau saunoaga ia pu leoleoa. O pu faateā fatu, pu foi ia e te i lava i le fetau i le auala faaee mai le pu, toe toe a oso i tua lau taavale. E pau lava ia o nai vaega ao vaega uma lava, faafetai o lea ua cover mai i le saunoaga a le Minisita.

Ma lou faaaloalo faafetai.

FOFOGA FETALAI: Tulai mai le sui usufono mo Vaisigano Nu 2.

Afioga TAPULESATELE MAUTENI TAMASONE METULI II ESERA: Faafetai mo lou avanoa. Lau Afioga i le Fofoga Fetalai. E tulai atu ona o le tulaga lea, o lea ua tele ia mataupu ia sa iloilo ina ananafi, o lea ua faaali le tele o finagalo i le tulaga lea sa i ai. O le faafogafoga foi ma le malamalamaaga i ai, o le toatele lava o i tatou o lea ua agai i ai finagalo. Ao nai vaega laiti lea e na ona toe talanoa atu ai, i le tulaga lea o le faaulufale mai o taavale nei. Ao le i tulai mai faafitauli nei, e tataua lava ona tagai lelei i ai, aua e aumai le faatagaga, ou te iloa o le LTA lea e aumai ai le faatagaga. Pe a tagai lava i ai i taavale ia o classic vehicles ia, **main tent bus** ma mea faapena. Afai o lea e avatu le faatagaga e aumai ai taavale ia i totonu o le atunuu, e tataua ona magafagafa lelei ia fuafuaga mo le faatagaina. E pei o le tulaga lena, e moni lava e i ai faiga foi ia, e faanana mai aumai ai se taavale i totonu. Aua e faigofie lava ia tulaga na. A faapea o lea ua ave le avanoa e faaoga ai le **main tent** vehicle lea i totonu o le atunuu i luga o le aualatetele, silasila la i ai. O iina e taumafai e taofi ai le tulaga lea. O le isi tulaga sa fai atu ai foi le tala ananafi. Ae tagai pea i le avanoa mo le faatinoga o le Tulafono. A faapea na o leoleo, afai o lea ua i ai le avanoa i le LTA i le tulaga lea i laisene ma mea faapena, e i ai le manatu e tataua ona silasila i ai. Aua o aso ia e tele lava i le afaigaluega la e i luga o le auala e tele i le LTA, ia ofisa ia a le LTA. A tulai mai se faafitauli, e LTA lava, e seasea ou vaai i se leoleo. E pei o le tulaga lena e toe tagai pea i ai, afai lava o le Tulafono o la e tutusa ia avanoa e ave i ofisa ia a le LTA ma le avanoa e ave i leoleo e faatino ai Tulafono ia, e manaia. Ona o nai mea laiti ia e toe avatu lau Afioga.

FOFOGA FETALAI: Malo. Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malilegaoui: Lau Afioga i le Fofoga Fetalai, o le mataupu lea sa laga i le ese o mea e ave i le LTA ese leoleo. O lea

ua i luma o le Kapeneta le mataupu se i toe tilotilo i ai. O le mea lea e tupu nei e pei o se solofanua e lua ulu, e toso i o e le isi ulu toso e i e le isi ulu, avane lea ua le iloa le mea e agai i ai. O lea la e toe tilotilo i ai, o mea o faiga faavae. O lea la ua i luma o le Kapeneta ia le mataupu lena, e fai foi si tele o nai vaiaso, o mafaufau malie pea i ai i le tulaga lea, ae ou te manatu o se mea ua tataua ona fai i ai se iuga. O le itu lea o le tulaga o taaloga ia, e le o taofia ia taaloga ia o tuuga taavale. E oo foi i isi taaloga ia e pei o taaloga lakapi, ua o lava le taaloga ia fai le latou lisi, fai la latou malae e faatino ai le latou taaloga. O lona uiga o lea mea, e le tau faia e le Malo ni mea faapena. O le tulaga lava ia e saoloto, ao le mea lea e avatu e le Tulafono, e le o taofia le aia tataua a i latou e fai ai a latou taaloga. E pau o le mea o i latou o fanau a tagata maumea, o latou e faatau se latou fanua e fai a latou tuuga taavale, e le o taofia le mea lena. Ae aua le o mai e faaoga le auala tele a le Malo e faatino ai ma ono aafia ai le soifua o tagata lautele. Lau Afioga i le Fofoga Fetalai, o le mea lena e tataua ona faasao e le o taofia. O la foi e o le au faifaiva e fai lava a latou taaloga o le faifaiva ma o latou lisi le mea e fai ai a latou Fonotaga. O le tulaga lena e le faia faapitoa e le Malo ni faiga faapitoa mo se vaega aemaise lava le vaega o la e tele a latou tupe, e mafai lava ona o latou e fai o latou eleele e fai a latou tuuga taavale.

FOFOGA FETALAI: Malo faafetai. Pe i ai se isi faaopoopoga a le Minisita, aua o lea ua saunoa le afioga a le Palemia.

Susuga Hon PAPALIITELE NIKO LEE HANG: Leai lau Afioga i le Fofoga Fetalai, na o nai mea laiti lava ia. Masalo ua galo i le sui usufono lea le Gafatasi le tulaga sa talanoa ai foi i mea ia o moli, o pu lapopoa. Sa ou fautuaina lava le Fonotaga ananafi e include atu ai ma pu leotetele. Ae masalo sa le faalogo le Afioga, o lea foi ua toe laga mai. Ae pau le mea e toe faamanatu, o au ia lea foi na note ananafi e le tamaitai pule, lea e sao e i ai au la e le i pepe, ao la o le a fai se galuega. Ao le saunoaga a le Palemia, masalo o lena ua tali uma atu ai fesili. Na ala ona ou faamauina ou te faafetai i lou uso le sui usufono mo Faleata i Sisifo, ona o lea e fai mai e laitiiti le Tulafono. Ae o le talitonuga lelei ona tape i i le laitiiti lea, ae le i sosolo faapapala le mea. Ae faafetai mo le fautuaga a lou uso. Ma le faaaloalo lava.

FOFOGA FETALAI: Malo faafetai. Ia o lea ua manino auofala i le tulaga e pei ona i ai.

Na faamaonia le lafo ma faitauina le Tulafono Tau Faaofi o Teuteuga o le Tulafono o Taavale Feoi i Ala Tetele 2019 i lona faitauga faalua.

FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi i le Komiti o le Vaega o Atinae Eseeese mo le iloiloaina ma toe lipoti mai i le Fono Aoao i se Fonotaga o lumanai.

Ia, talu ai ona o lea ua tatou toai taunuu i le tatou malologa masani, e i ai le manatu o le Nofoa, o le a faataatiaese Galuega a le Fono Aoao mo lana malologa masani i le taeao.

Na faataatiaese Taulumaga a le Fono Aoao Faitulafono mo lana malologa masani i le itula e 10:51 i le taeao ma toe faaauau i le itula e 11:33 i le taeao.

FOFOGA FETALAI: Ou te toe faasilasila atu ua toe amatalia Taulumaga ma Galuega a le Fono Aoao Faitulafono. Ma e atonu o lea ua faaopoopo le malosi o sui usufono mamalu o le Palemene e faaauau ai le tatou galuega e ala i le faasiliga malosi. Ou te manatu e faapea foi le paia i le aufaigaluega a le Malo i Ofisa Sili o Pulega o Matagaluega ma Faalapotopotoga, aemaise o le aofia ua mafai ona tatou potopoto.

**TULAFONO TAU FAAOFI O TEUTEUGA O LE TULAFONO O LE
AOGA TAU FAATOAGA A LE IUNIVESITE O LE PASEFIKA I
SAUTE 2019 – faitauga faalua**

FOFOGA FETALAI: Ou te tapa ma le faaaloalo lau Afioga i le Minisita mo Aoga, Taaloga ma Aganuu.

Afioga Hon LOAU SOLA KENETI SIO: Faafetai i lau Afioga i le Fofoga Fetalai. E manatu foi o lea ua sao i alo le taliga o le sua i le Maota nei, ua maua le faasiliga malosi.

Ae ua ou tulai atu ma le agaga faaaloalo lau Afioga i le Fofoga Fetalai e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Aoga tau Faatoaga a le Iunivesite o le Pasefika i Saute 2019 i lona faitauga faalua, ma ou te fia tautala faamalamalama i ai.*

Faaluaina e le Minisita o Tupe ma le Minisita mo Faamasinoga ma Pulega tau Faamasinoga ma le Minisita mo Fesootaiga ma Faamatalaga Tekonolosi.

FOFOGA FETALAI: Ou te tapa lau Afioga mo lau saunoaga e faamalamalama ai lenei Tulafono Tau Faaofi.

Afioga Hon LOAU SOLA KENETI SIO: Lau Afioga i le Fofoga Fetalai, o le tasi lenei o Tulafono a fua i ai ua fai si leva, o le 1977 na faavae ai, o le ala lea ua i ai le agaga e le gata o le Iunivesite, aemaise o le Loia Sili ina ia fai ni teuteuga e fua i le tulaga ua i ai nei foi taulumaga o aoaoga i lenei vaitau ua tatou oo i ai. A fua i le 1977 o lenei ua 2017, ua 2019 lenei, ua toeitiiti lava tala le penisione a le Tulafono. O lona uiga ua alagataua ona i ai ni teuteuga e pei la ona i ai le faatulagaga e i ai le Tulafono Tau Faaofi e pei ona i ai i lenei taeao.

O le auga o le faamoemoe, ona o le Tulafono Autu 2017 ua leva ona faafoeina e le Matagaluega o Faatoaga. Aisea? Ona e mafua mai ona o aoaoga sa faatino i lona vaitaimi, e patino tonu lava i aoaoga ma tomai tau faatoaga. Sa faapena ai loa ona amata faatalatalanoaga, e le gata i le Ofisa o le Loia Sili, o le USP ina ia i ai ni teuteuga o le Tulafono e pei ona i ai le Tulafono o lo faapena ona tau faamatalaina nei. E tele ni vaega e le i manino lelei na i ai i le Tulafono Autu 1977, o lo o noatia ai le malosiaga o le Iunivesite o le Pasefika ma nisi vaega e le o aloaia i totonu o le Tulafono Autu. E atagia mai i le Tulafono Autu 1977, le le manino o faatomuaga o Tulafono ma faamatalaina o uiga o upu, vaega taua e tatau ona i ai pe a faatusatusa i suiga ma nisi o Tulafono Faatonutonu e lagolagoina ai lenei Tulafono, e pei o le Minisita o Aoga, e tatau ona faafoeina lenei Tulafono. O atunuu uma o le Pasefika e ona le Iunivesite o le Pasefika, o le sainia e Samoa o le maliaga i le aso 25 Me 2017 i Marshall Island. O le faamanoina o le maliaga po o le convention e

tatau ona manino mai i totonu o le Tulafono Autu. O le taua o le aloaia o le maliega po o le convention i le Tulafono Autu ona o le maliega o lo o aiaia ai aiaiga o le soalaupuleina o ni faafitauli e tulai mai i maliega i le va o Samoa ma le Iunivesite o le Pasefika, faapea le tatou maliega e fai ai Samoa ma paaga o le Iunivesite o le Pasefika.

O vaega taua nei e aloaia ai maliega i totonu o le Tulafono Autu, ma o le ala foi lea o le moomia o le teuteuga o le Tulafono Tau Faaofi mo le Iunivesite o le Pasefika i Saute mo aoaoga tau faatoaga, ina ia aloaia le maliega ma ona aiaiga.

O lea e faatu mai ai i totonu o le Teuteuga o le Tulafono Tau Faaofi teuteuga nei: Fuaiupu 2 ma le Fuaiupu 5, teuteu le ulutala o le Tulafono Autu i le aveeseina o le fuaiupu aoaoga tau faatoaga, ae aloaia le Iunivesite o le Iunivesite o le Pasefika i Saute mo Aoaoga Tau Faatoaga 2019, e le o se aoga pei ona i ai i le Tulafono Autu.

Aveina o le Iunivesite i lona fuaiupu 8, i totonu o le Tulafono Autu 1977, University of the South Pacific Agriculture Act 1977 o lo o faaigoa ai le Iunivesite o le Pasefika, o le aoga, school of the University of the South Pacific po o le School of Agriculture Alafua Samoa.

Ia, o le lisiina o aseta, tasi lea vaega o lo o faapena ona i ai le teuteuga o le Tulafono Tau Faaofi, o lo o talosagaina ai le faaopoopoina o se vaega fou, o lo o i ai le Vaega 4 e faapea, lisi ma aseta, ina ia mafai ai ona manino le autu o lea vaega ma avea ai le malosiaga e mafai ai e le Malo po o le Land Board ona faamatuuina atu lisi o ni fanua e faaoga e le Iunivesite mo le 60 tausaga amata mai le aso 1 Ianuari 1977 i luga o le maliega a le Malo ma le Iunivesite.

Ia, o lona tolu o aiaiga eseese o lo o tuuina mai foi i totonu o le Tulafono Tau Faaofi i le faaofi atu i ai o le vaega fou e pei ona faaulutalaina o aiaiga eseese. O lenei vaega ina ia faamanino ai aiaiga ua tuuina atu faaletulafono i le Iunivesite e mafai ai ona faatino ni faaiuga ma ni malosiaga e apalai ai lenei Tulafono e tusa ai ma fanua ua tuuina atu e faatino ai aoaoga a le Iunivesite.

O lo o tuuina mai foi i totonu o le Tulafono Tau Faaofi ni teuteuga taua tele e aloaia ai le malosiaga o Le Ao o le Malo e aiaia ai se Tulafono Faatonutonu mo le tauaveina o faamoemoega autu o le Tulafono Autu. E le i aloaia lenei vaega autu i le 1977 lau Afioga i le Fofoga Fetalai, ma ua alagatau ai ona faamanino e tauala i le Tulafono Tau Faaofi.

Faamatalaina o upu i suiga mai le Tulafono Tau Faaofi i le Tulafono Autu. I le faatino ai o lenei teuteuga o le Tulafono Tau Faaofi o le Iunivesite o le Pasefika i Saute mo aoaoga tau faatoaga 2019, o le a faapea ai loa ona aloaia le faitauina o le Tulafono Autu 1977 ó Tulafono o le Iunivesite o le Pasefika i Saute mo Aoaoga Tau Faatoaga 2019 e fai ma Tulafono o le Iunivesite o le Pasefika i Saute 1977.

Ia, e pei o le auga lea ma le faamalamalamaga i lau Afioga i le Fofoga Fetalai o le Teuteuga o le Tulafono o le Iunivesite ina ia mafai ona tuu i ai i totonu ma atili mautu ai ma mausali aua le faagaioiga o galuega a le Iunivesite mo le agai i luma. Mo le silafia foi, ua tele isi polokalame fou lea ua mafai ona faaofi i totonu o le Iunivesite, ma e i ai le naunautaiga i le agai i luma, talosia aua o le tele o polokalame e fai mai iinei, o le a mafai ai foi ona mafai e tatou tamaiti ma alo ma fanau a le tatou atunuu ona nonofo iinei i Samoa ma le tau o i Fiti e fai ai polokalame ia, a o lea ua atagia ai o lo o mafai ona faatino i lalo o le tatou Iunivesite i Alafua. E pei o nai teuteuga ia lau Afioga ma le agaga faaloalo.

FOFOGA FETALAI: Malo faafetai. Ia se i tulai mai le Afioga i le Palemia.

Susuga Hon TUILAEP AUELUA FATIALOFA LUPESOLIAI NEIOTI AIONO GALUMALEMANA Dr. SAILELE MALIELEGAOI:

Lau Afioga i le Fofoga Fetalai, ia te au lava ia... e faamalo foi i le Minisita ma le latou Matagaluega. O le suiga aupito ogaoga lea e i ai i, o le faaigoa loa o le Iunivesite lenei o le Iunivesite o le Pasefika i Saute, uma, piriota. O le mea lea sa i ai i le amataga ona o le fulisia lava o mafaufauga e faaauau aoga tau faatoaga sa faatino i le Kolisi i Avele. E pei la o mafaufauga na sa i ai i le amataga sa faaauau ai pea le faalupe o le Iunivesite lea o le lala o mea tau faatoaga ma le agaga e omai uma i ai le Pasefika i Saute atoa. Ae mulimuli ane, ua toatele lava atunuu ua fai lava latou kolisi tau faatoaga ae o lala o le Iunivesite. I lau la faauigaina, a o le mea lea e ave ai le faafetai foi i le Minisita ma le suiga ua aumai, ona e i ai le upu foi lele a Petelo, e na o si fasimea e le o se mea atoa. O lona uiga la, o le Iunivesite lea sa i ai a tatou, na o sina fasi Iunivesite, lea la faatoa Iunivesite atoatoa ina ua i ai le suiga lea. O le mea nei o le faatumutumuga o atinae a Samoa e tataua ona agai i ai, o le lauelele, a ua tau mama tamaitai e o e ave ia... o le tele ia o sikolasipi ia e i totonu o le tatou Malo mo mea o mataupu tau faatoaga. E galo i le toatele o tatou fanau aemaise foi faiaoga ma matua, o isi tagata lauiloa o le tatou atunuu ma le lalolagi, o i latou ua maua o latou Bhd e avea o fomai faapitoa i mea tau faatoaga. O lea la e faaluulu nei i le tatou Fale Suesue le isi foi fomai o saienitisi i mea tau faatoaga. O lea la pei e taumamaina e le toatele ona o le manatu ai lava na o le mataupu foi lea o lou alu toto le tiapula toto le niu, ae tele le lavelave lea e i totonu e matua maualuga ai fanau a le atunuu i le latou maua o faailoga. Lea foi e lautele le tulaga o le faamuamua o lo o ave e le tatou Malo i sikolasipi i mataupu ia tau faatoaga, ae pei e tau mumusu ai ona o le upu lava lea o le kolisi o faatoaga, e pei o se fasi Iunivesite e le o se Iunivesite atoatoa. O lea la faatoa atoa lau Afioga, ua mafai nei ona tau o le Iunivesite o le Pasefika i Saute. Ia pe alu alu foi i le lumanai te i ua tupu ae se manatu, fai uma loa i i isi faailoga e i ai le BA, MA i mataupu lautele, Inisinia, o mea faapena ua faigofie ona faatino i le lumanai ona o lea ua taua nei o le Iunivesite ua atoatoa. Ia te au lava ia, o le suiga tele lenei lea ua taota ai nei le tatou Iunivesite, aua e mafai ona tupu manatu, ua leva a ona i ai le Iunivesite a o lea ua toe fai atu nei foi teuteuga i le igoa a ua leva lava ona i ai i Samoa nei.

Lau Afioga o le tulaga lenei e taua tele ai le Teuteuga lenei, ina ia suia le igoa o le Iunivesite ina ia foliga mai ai o le Iunivesite atoatoa ae le o se fasi Iunivesite. Ia manuia le tatou Fono.

FOFOGA FETALAI: Malo, faafetai. Ia o lea ua atili manino auofala ma malamalama le mataupu e tusa ai o le saunoaga a le Afioga i le Minisita, ia ae o lea foi ua toe malele le Afioga i le Palemia, i le aotelega o le tuufaatasiga o le agaga o le Teuteuga o lenei Tulafono. Ia ua i ai le manatu ua nofo fale ia Satuiamaa ia outou finagalo le agaga atoa.

Afioga SULAMANAIA FETAIAI TAUILILI TUIVASA (Vaimauga Sasae): Lau Afioga i le Fofoga Fetalai pe maua se avanoa,

FOFOGA FETALAI: Ia ae ona e le taofia ai lava ia finagalo o sui usufono o tutulai mai, ia ou te tapa le sui usufono o Vaimauga Sasae e tulai mai se i aumai lou finagalo.

Afioga SULAMANAIA FETAIAI TAUILILI TUIVASA: Faafetai mo le avanoa i lau Afioga i le Fofoga Fetalai i lenei taeao. Ia e fia fai foi se sao o lenei itumalo i le Tulafono Tau Faaofi foi ua opea nei i le Maota, ia e muamua lava ona momoli atu le agaga faafetai i lau Afioga i le Taitai, lau Afioga i le Palemia ma le Sui Palemia aemaise foi lenei Faigamalo i lenei Maota fou ua tatou i ai i lenei taeao. Faamalo le galulue faafetai foi le manatu i le atunuu mo le tautuaina o le atunuu.

Ae o se manatu o lenei itumalo ona o le taua o lenei mataupu ua opea nei i le Maota Fono. E muamua ona momoli le agaga faafetai i lau Afioga i le Minisita, ona o se tulaga ua leva ona tataua ona tuuina mai i totonu leni Teuteuga foi e ala i le Iunivesite i Alafua e ala i le Matagaluega lea o le Ofisa o Faatoaga o lo o faapitoa i ai. O lau maitau i lenei Iunivesite, ia e pei sa lilifa lava ia le tulaga i le tatou atunuu i alo ma fanau e tuuina atu ina ia maua ia faailoga e ala i le faifaatoaga.

Ia ae faafetai i lenei talutalufou ua tulai mai lau Afioga i le Minisita mo Aoga ma lau Minisita Lagolago ma le Pulega, ua afea ai le tatou Iunivesite i nisi o auaunaga po o aoga faaauau. O lau la tatalo ma lou lagolagoina o leni Tulafono, ia ona o le tulaga lea pei e i ai si o tatou Malo, e laititi ia lo tatou tamaoaiga, ona o la foi e na o le Aoga Faifaatoaga o faatino i uta ma nisi o courses e i ai le faaloia ma mea faapena.

Ae ou te faafetai ma talosagaina ai lau Afioga i le Minisita ma le Matagaluega, ina ia mafai ona faatosina mai ai aoaoga la e fai i Fiti. Matau o Vanuatu lea e i ai le Faaloia ma le Education. Ia ae a mafai la ona aumai ma nisi o aoaoga o lo o faatinoina i Fiti, e faatino i inei i le tatou atunuu e ala i gauta i le USP i Alafua, e talitonu le sui usufono mo Vaimauga ua tamaoaiga le tatou atunuu e le gata i le aumai o faiaoga e maua ai le totonu e tax ai tatou, e maua ai le tupe a lo tatou atunuu i inei, a o tagata faigaluega foi. Aua o totonu o le USP lea i Alafua, ia e pei ona saunoa foi le Tama o le Atunuu i lenei taeao, o tagata la e i ai, e le mafai ona e faiaoga ai pe a leai sau PHD. O lona uiga o ni totonu maualuluga pe level ma le totonu o CEO mea tau faiaoga. A o le tulaga o le siisii i luga e oo i le Pule, e pei o se mea o le \$200,000 i le tausaga. E tele ai tatou tupe e tipi ai latou lafoga ma atinae ai foi si o tatou atunuu. E le gata i lea o le a maua ai foi galuega a alo ma fanau i inei.

Ou te faafetai lava ona ua afea le tulaga leni, ina ia siitia ai lenei auaunaga aua e... e pei o le faataitaiga o Vanuatu, ia la ua i ai le School of Law ma le Education ia ae o tatou na o le faifaatoaga lava. E faafetai ai la i le Afioga i le Minisita i le mataala, o lea ua leva ona tataua ona aumai leni aoaoga i si o tatou atunuu, ina ia faatosina mai ma le o i fafo o fanau. E moi lava o lea e fai online, o lea e i ai loa o lea e maua atu i inei ia ae lelei o le faatosina mai i totonu, e o mai ai ma faiaoga. Aua a o mai ma nonofo ai i nei faiaoga e totonu ai i inei ma maua ai a tatou tupe maua. O le agaga lea o lou sui usufono.

Ae o le tatalo e tuuina atu i lau Afioga i le Minisita, se i silasila lava aua o le tulaga lea o le faifaatoaga ia, pe le mafai ona lau ai ma le tulaga foi lea o le faafaigafaiva. E moi lava o lea ua i ai le tulaga lea o le Maritime foi lea, ae se i silasila ane i le tulaga o le faafaigafaiva. O e e fia suesue i le sami, aumai i gauta. Faatosina mai aua o lau Afioga i le Minisita e matau atu i le 12 o atunuu lea o lo o i ai i totonu i leni Iunivesite, ia o lau Afioga lava o le Pule

lea. Aua o Minisita o Faauluuluga uma ia o nei atunuu e 12, ia o oe foi e te finauina e aumai nisi aoaoga e faatino i gauta i le tatou Aoga ia ma tele ai ia o tatou tupe maua, ia ma tele ai galuega a o tatou tagata.

O le isi o vaega o le fai se penefiti po o se ponesi i e o le a aoaoina i Alafua. Na saunoa foi lo tatou Tama i lenei taeao, pe tau loa fai atu le tamaititi o le a alu i uta i Alafua fai mai foi matua, o le a e toe alu foi i lena faifaatoaga o lea e matitiva le tatou aiga. Ae le iloa o la e alu ona e sau ma le faailoga faaSaientisi. E le sau la e alu e faifaatoaga ae sau e foia le mea e maua ai faamai ma mea faapena o le Saientisi. E le alu e galue le palapala ae na o le faatonutonu lava ma faufautua i faifaatoaga.

Faafetai i avanoa faasikolasipi. O le uiga la o lau faamatalaga i lau Afioga i le Minisita ma le Matagaluega mo Aoga, pe le mafai ona tuu i ai se ponesi o e faauu mai le USP i Alafua, ia ese lava le level e pay ai e le Malo, ina ia faatosina ia o tatou alo ma fanau e o e ave ia le auaunaga. Faafetai o lo o i ai ia le online i nai vaega lea e i Savaii, ia ae o le tatalo foi a Savaii ia, pe mafai ona faalatele atu ia le tulaga i aoaoga ia o lo o faatino mai i Savaii i Salafai i Salelologa, e faatino atu i o i Falealupo ma Sataua, ina ia mafai ona oo atu i ai ia lea auaunaga.

O le tulaga i le vaai foi i le tatou aoga lea i le USP i Alafua, ia ou te lagolagoina e lou nei sui usufono le toe faamatuu i ai o nisi eleele, ina ia mafai pea ona finauina e lau Afioga i le Minisita mo Aoga ia Fiti po o nisi foi atunuu ina ia faatoatele le aumaiga i totonu o nisi aoaoga e faatino i gauta, ina ia tele ai le tamaoiga o si o tatou atunuu e ala i faiaoga. Ia e pei o nai vaega ia e tatalo atu ai ma lagolagoina e lenei itumalo ia le talosaga ia ma le tulaga foi ua i ai lenei mataupu, ia faatauaina lava o le vaega lea o le tatou Iunivesite, ia ma lou agaga faaaloalo lava i lau Afioga ua maea ai i se sao o lenei itumalo.

FOFOGA FETALAI: Faafetai, malo, faafetai. Tulai mai le sui usufono mo Alataua i Sisifo.

Afioga ALIIMALEMANU ALOFA TUUAU (Alataua i Sisifo): Ia, faatalofa atu i lau Afioga i le Fofoga Fetalai faapea sui usufono mamalu o le Palemene. Ia faafetai i lau Afioga i le Minisita, mo le faamalamalamaina o le Tulafono aua o le aso ananafi, sa tele lava ina matou taape matou te le mailoa le uiga tonu o le Tulafono. Sa tele ai foi le le femalamalamaai. Ia ae o le taua la o lau saunoaga i lenei taeao, o lea la ua malamalama tonu atu ai i le auga o le Tulafono ua suia ai foi se lagona o lenei taeao, ma ua lagolagoina ai le Tulafono, ona o le itu lea, e tatau pea ona tatou lagolago aua o tatou o le sui, i totonu o atunuu i le Pasefika, ina ia faalatele le tagai i Polokalame, aua a matau lava i e aooga i le faafaatoaga, e le toe atoa se 80. E le mafai la ona avea le 80 lena o pili ma mea e mafai ai ona maua tupe e faatino ai le aoga a le... i uta i Alafua. Ae avea le faalatele e tele ai tamaiti aooga, ia ma mafai ai ona sustain ia le running o le faatinoina o le aoga.

E pau le manatu lea e tau avatu i i o le tulaga lea o le malosiaga o le Senate lea ua tuu i totonu ia le chart ia ma isi galuega taua ia ina ia faamausali ai ia le Tulafono. Ma e lagolagoina loa le aveeseina o le School of Agriculture, a ua tau lava o le Iunivesite o le Pasefika ina ia faalatele. Pau le mea o le malosiaga lea i le Senate ina ia faamaonia ni Polokalame Fou tau tomai ma suiga i Polokalame i lalo o le 29, pe ua uia ia tulaga, i le tatou suia lea o le igoa mai ia latou schools ia sa faavae ai e pei o le School of Law ma le School of Agriculture ae afai ua maea, ia e leai se tala tele e toe faia i ai. E pei na pau

lena o lea e vaai atu o lea e i ai le malosiaga o le Senate e suia ai Polokalame ae out e talitonu o lea e i ai le tomai i totonu o le aufaigaluega latou te tagatagai i ai i ia itu.

Ia o le tulaga mulimuli lea e tau fai atu ai se tala e pei ona sa maua foi o le tele o isi aoaoga ia o lo o mafai ona maua i isi atunuu e pei o Fiti ma o i Vanuatu, ia o lea ua taumafai e aumai uma i inei. O lou popolega la, e le feteenai ai la ma le tatou Iunivesite le National University, o le a se fuafuaga i lea tulaga? Afai o lea o le a fai pea faapea o lea o le a fai le BA Accounting i uta i le Iunivesite a tatou, ia ae o lea o le a faalatele foi ia Polokalame i le USP ma aumai ai foi ia na faailoga e fai o... E pei na ona pau lava na o si ou popolega lea e i ai, ona o le a feteenai ai mea e 2, ia ae mo le taimi lenei, atonu foi o le a oo i ai foi se iloiloga ia ma ni mafaufauga ia ma ni mafaufauga ina ia aua ne i i ai ni ia tulaga, ia aua le agai i luma o le Tulafono mo le aotelega, faafetai. O le mea sili lea ua faalatele le aoaoina i le tatou Iunivesite i le Pasefika ma e lagolagoina ai le Tulafono ma le agaga faaaloalo faafetai.

FOFOGA FETALAI: Malo faafetai. Ia atonu e le tele ni sui usufono sa toe fia saunoa. Tapa lau Afioga i le Minisita.

Afioga Hon LOAU SOLA KENETI SIO (Minisita mo Aoga): Ia faafetai atu o lea ua manino auofala e pei ona saunoa foi nisi o uso a sui usufono i nisi o finagalo. E pei e foliga mai o fautuaga o lo o aumai, faamauina ma le agaga faaaloalo fautuaga. Sui usufono mo Vaimauga ma le sui usufono mo Alataua i Sisifo, ia e pei foi ona i ai ia le Presitting ananafi, masalo ua manino atoatoa foi, o tulaga e pei ona i ai Polokalame, ia o le vaai mamao lena, o le tatou Iunivesite. O le mafaufauga e aoga le 2 foi, ina ia mafai ai ona faatauva, i le isi foi tulaga e saili ai le potu ma le tomai, aua o lea lava e ave le tatou faamuamua i le Iunivesite i le taimi nei e agai ai i isi Polokalame, ia ae o le silasila foi a le Council o le University of the South Pacific, ia o le taua foi o le available o isi Polokalame i totonu o atunuu taitasi, o le avea foi ma faatauva aua e leai lava foi se atunuu e le o toe i ai se latou National University, e fai ai le faatauva ma tilotilo ai foi i le quality of education ia o lo o faapena ona mafai ona auauna... i ai le auaunaga i totonu o le Iunivesite.

Ia e pei o le agaga lea, ae faafetai mo fautuaga ua faamauina, ia atonu foi o le isi foi auililiga i se isi taimi o i luma, e mafai ai foi ona faalatele ai atili finagalo e pei ona faaalua, ia ma le agaga faaaloalo lau Afioga i le Fofoga Fetalai.

FOFOGA FETALAI: Malo faafetai.

Na faitauina le Tulafono Tau Faaofi o Teuteuga o le Tulafono o Aoga tau Faatoaga a le Iunivesite o le Pasefika i Saute 2019 i lona faitauga faalua.

FOFOGA FETALAI: E tusa ai ma Tulafono Tumau, o le a tuuina atu le Tulafono Tau Faaofi i le Komiti o le Vaega Tau le Va Fealoai mo le iloiloia ma toe lipoti ma ii le Fono Aoa o se fonotaga o lumanai.

LAFO MO LE FAATAATIAESE O TULAFONO TUMAU.

FOFOGA FETALAI: Ou te tapa lau Afioga i le Palemia mo se Lafo.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai ou te faatu le lafo, *Ina ia faataatiaese Tulafono Tumaui 108(4) ina ia avanoa ai le faitauga faatolu o Tulafono Tau Faaofi ia sa iloiloia auiliili i le aso fono lenei.*

Faaluaina e le Minisita mo le Soifua Maloloina ma le Minisita mo Pisinisi Alamanuia ma Leipa.

Faamaonia.

TULAFONO TAU FAAOFI O TEUTEUGA O LE TULAFONO O TAU MO FAALAVELAVE TUTUPU FAAFUASEI 2019 – faitauga faatolu.

FOFOGA FETALAI: Tapa lau Afioga i le Minisita o Faalapotopotoga o Galuega Tumaoti a le Malo, lau Afioga Lautafi.

Afioga Hon LAUTAFI FIO SELAFI PURCELL (Minisita mo Pisinisi, Alamanuia ma Leipa): Faafetai atu i lau Afioga i le Fofoga Fetalai. Lau Afioga i le Fofoga Fetalai ae le i oo atu se leo i le Tulafono, e fia faamauina le faamalo a le itumalo lenei o Satupaitea. Faamalo i lau Afioga i le Fofoga Fetalai tainane foi le Faigamalo i le maea ai o lenei galuega matagofie e pei ona tatou molimauina i le aso, o lea ua avea ai tatou ma Paeaiga muamua ua nofoia lenei Maota matagofie o le a fai mai i ai Paeaiga i nisi tausaga se tele o i luma. E talafeauga foi lau Afioga le talanoaina o le Tulafono a le Matagaluega lenei mo Faalavelave Tutupu Faaofuasei po o le ACC, na ona faailo atu ai lava i le mamalu o le tatou Palemene nei aemaise foi le faafofogaaga a Samoa, e matagofie le fale i totonu, a ua matagofie atili foi ma fafo. A outou silasila atu i pou na o lo o filiina mai i afa, o le sao lena o le Matagaluega lenei o le ACC. E le i i ai tulaga na i le ata sa faataatia e Ausetalia, ae ua tonu i le manatu o le Matagaluega se i fai se latou sao ina ia faamanaia atili ai lenei fale, ina ia maua ai le auga, o le fale Samoa, o le Maota Samoa. Ia atonu o lena ua tele le fesoasoani o le galuega a le ACC i le faamatagofieina o lenei Maota lau Afioga.

Ae ua ou tulai atu e faatu le lafo, Ina ia faitauina nei le Tulafono Tau Faaofi o Teuteuga o le Tulafono o Tau mo Faalavelave Tutupu Faaofuasei 2019 i lona faitauga faatolu.

Faaluaina e le Minisita mo le Soifua Maloloina.

Na faamaonia le lafo ma faitauina le Tulafono Tau Faaofi i lona faitauga faatolu i le Palemene ua potopoto ma faapea ona pasia le Fono Aoa Fautulafono.

**TULAFONO TAU FAAOFI O TEUTEUGA O LE TULAFONO O LE
KOMISI O LE GAGANA SAMOA 2019 – faitauga faatolu**

FOFOGA FETALAI: Ou te tapa lau Afioga i le Minisita mo Aoga, Taaloga ma Aganuu.

Afioga Hon LOAU SOLA KENETI SIO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Komisi o le Gagana Samoa 2019 i lona faitauga faatolu.*

Faaluaina e le Minisita mo Faamasinoga ma Pulega tau Faamasinoga.

Na faamaonia le lafo ma faitauina le Tulafono Tau Faaofi i lona faitauga faatolu i le Palemene ua potopoto ma faapea ona pasia le Fono Aoao Faitulafono.

**TULAFONO TAU FAAOFI O TEUTEUGA O LE TULAFONO O LE
FETUFAAIGA O FAAMATALAGA TAU LAFOGA 2019 – faitauga
faatolu**

FOFOGA FETALAI: Ou te tapa le Afioga i le Minisita mo Tupe Maua.

Afioga Hon TIALAVEA FEA LENIU TIONISIO HUNT (Minisita mo Tupe Maua): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Fetufaaiga o Faamatalaga tau Lafoga 2019 i lona faitauga faatolu.*

Faaluaina e le Minisita o Tupe ma le Minisita mo Aoga, Taaloga ma Aganuu.

Na faamaonia le lafo ma faitauina le Tulafono Tau Faaofi i lona faitauga faatolu i le Palemene ua potopoto ma faapea ona pasia le Fono Aoao Faitulafono.

FOFOGA FETALAI: Ia, ou te tapa ma le faaaloalo lau Afioga i le Palemia o le Taitai foi o le Maota mo se lafo ma sou finagalo.

LAFO MO LE TOLOPOINA

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te tulai atu ma le faaaloalo e faatu le lafo, *Ina ia tolopoina nei Taulumaga o le Fono Aoao Faitulafono seia aulia le Aso Lua, 28 Me 2019 i le itula e 9:00 i le taeao.*

Faaluaina e le Minisita mo Pisinisi, Alamanuia ma Leipa ma le Minisita mo le Soifua Maloloina.

FOFOGA FETALAI: Ia, talu ai ona ua maea galuega faatulagaina mo le tatou uluai Fono i lenei aso, o lea ua maea ona tagofia e le Palemene le tatou galuega. Ma o lea ua faatu mai le lafo ma ua faaluaina ina ia tolopo le tatou Fonotaga seia aulia le Aso Lua, 28 o Me 2019 i le itula e 9:00 i le taeao.

Na faamaonia le lafo.

FOFOGA FETALAI: Ae tatou te le i tolopo, ou te momoli le faafetai ma le agaga faamalo i le paia ma le mamalu o Taitai o le Atunuu, le paia o le Palemia ma le Sui Palemia ma le Kapeneta, Minisita Lagolago, e faapea foi Taitaifono ma le mamalu o le Palemene, aemaise foi o Ofisa Sili o Pulega o Matagaluega ma Faalapotopotoga Tumaoti a le Malo o lo o latou galulue e saili manu e ala i fautuaga e tuuina mai i le Malo mo le atiaaina o le tatou atunuu, e faapea foi le Ofisa o le Fono Aoa ma le auunaga a le Ofisa o Leoleo. Ou te faasilasila atu ma faamanatu atu pe a maea Taulumaga o le tatou Fono, e faia le puega o se ata i le sitepu i luma atu o le Palemene, o se ata mo le tatou Palemene mo lenei foi Paeaiga ua pule alofa le Atua ua tatou aulia.

Ma le faaloalo, ae tatou te le i tolopo, o le a ou faaiuina le tatou Fonotaga i se tatalo.

Na tolopo Taulumaga a le Fono Aoa Faitulafono i le itula e 12:12 i le aoauli seia aulia le itula e 9:00 i le taeao o le Aso Lua, 28 o Me 2019.